

Jeeñ náka'an yoñ sava jnuñ'un jeñ ka'án
Antiguo Testamento
Libro 5

Jeeñ ní kandaku rey Saúl jiín
rey David jiín rey Salomón
jniñu nuñ yuu Israel



En el mixteco de San Esteban Atatlahuca

**Jee náka'án yo sava jnu'un jeé ka'án
Antiguo Testamento
Libro 5**

**Jee ní kandaku rey Saúl jiín
rey David jiín rey Salomón
jniñu nuu ñáyuu Israel**

**Serie de
Resúmenes del Antiguo Testamento
Número 5: 1 Samuel 8–31, 2 Samuel,
1 Reyes 1–11, 1 Crónicas, 2 Crónicas 1–9**

en el mixteco de San Esteban Atatlahuca

LAS SAGRADAS ESCRITURAS PARA TODOS



**LA LIGA BÍBLICA, A.C.
México, D.F.**

Todas las ilustraciones son propiedad de
©David C. Cook Publishing Co., 1978,
usadas con el permiso correspondiente.

©La Liga Bíblica, A. C. 1999

Primera edición
Resúmenes del Antiguo Testamento
Número 5: 1 Samuel 8–31, 2 Samuel,
1 Reyes 1–11, 1 Crónicas, 2 Crónicas 1–9
Mixteco de San Esteban Atlatlahuca
99-047 México, D.F. 1C

Sumario

Letra jee tu iin jéjníñu castellano jiín mixteco	5
Prólogo	7
81. Jee ní tejníñu ya Saúl kuu de rey ñuu Israel	9
(jee ka'án libro 1 Samuel 8:1-13:2)	
82. Jee ní kunij'ni ni rey Saúl nuu Yaq Dios, te ni ka'an yaq jee ma kíu ga kuu de rey	13
(jee ka'án libro 1 Samuel 13:3-15:35)	
83. Jee ní tejníñu ya David nduu de rey ñayuu Israel	18
(jee ka'án libro 1 Samuel 16:1-13)	
84. Jee ní tee David yaa jiín arpa nuu rey Saúl	19
(jee ka'án libro 1 Samuel 16:14-23)	
85. Jee ní je'ni David in soldado filisteo jee sukún ndasí	19
(jee ka'án libro 1 Samuel 17:1-18:5)	
86. Jee ní kukuñíñ rey Saúl jiín David, te kúní de ka'ni de David	22
(jee ka'án libro 1 Samuel 18:6-20:42)	
87. Jee ní jinu David ni jito de rey Saúl, te kue'e ñayuu ndikín de	26
(jee ka'án libro 1 Samuel 21-23)	
88. Jee ni íyo uu jinu jee kuu ka'ni David rey Saúl nuú, te tu ní sá'a de	29
(jee ka'án libro 1 Samuel 24-27)	
89. Jee ni jí'i rey Saúl jiín sé'e yií de nuu ní kakajná'an de	34
(jee ka'án libro 1 Samuel 28-31; 1 Crónicas 10)	
90. Jee ní nukuiñí David kuu de rey ñuu Israel	37
(jee ka'án libro 2 Samuel 1-6; 8-10; 1 Crónicas 11-16; 18-20; 26:29-27:34)	
91. Jee ní jejnu'un Yaq Dios jee sá'a ya jee vá'a jíín David	43
(jee ka'án libro 2 Samuel 7; 1 Crónicas 17)	

92. **Jee ni sá'a rey David kuechi xeñ nuu ya, te ni
ine ká'nu ni ya nuu de** 45
(jee ka'án libro 2 Samuel 11-12)
93. **Jee ní ndonda Absalón siki tatá de David** 49
(jee ka'án libro 2 Samuel 13-15)
94. **Jee ni sá'a Yaq Dios jee tu ní jéjnínu va'a jeé sá'a
Absalón** 52
(jee ka'án libro 2 Samuel 16-20)
95. **Jee ni sátu'va David ndajnínu jee kuva'a veñu'un
nuu ya** 57
(jee ka'án libro 2 Samuel 24; 1 Crónicas 21:1-26:28;
28:1-29:22)
96. **Jee ní tava rey David kue'e yaa jee ka'án jnu'un
yíñu'un núu Yaq Dios** 61
(jee ka'án libro 2 Samuel 22-23; 1 Crónicas 16;
Salmos 18; 96; 105:1-15)
97. **Jee ní nukuiñi Salomón, se'e yií David, kuu de
rey ñuu Israel** 64
(jee ka'án libro 1 Reyes 1:1-2:12; 1 Crónicas 29:22-30)
98. **Jee ni kíví Salomón kuu de rey ñuu Israel** 67
(jee ka'án libro 1 Reyes 2:13-4:34; 2 Crónicas 1)
99. **Jee ni sá'a rey Salomón in veñu'un nuu ya** 71
(jee ka'án libro 1 Reyes 5-7; 2 Crónicas 2:1-5:1)
100. **Jee ni sá'a rey Salomón in viko jee ni jínu
veñu'un** 73
(jee ka'án libro 1 Reyes 8:1-9:9; 2 Crónicas 5:2-7:22)
101. **Jee ní kujé'nu ndasí rey Salomón** 77
(jee ka'án libro 1 Reyes 9:10-10:29;
2 Crónicas 8:1-9:29)
102. **Jee ní yií Salomón te ni kunj'ni ni de nuu
Yaq Dios** 78
(jee ka'án libro 1 Reyes 11; 2 Crónicas 9:30-31)
- Íyó jnú'un jee ka'án nuu Antiguo Testamento te
náka'an tuku nuu Nuevo Testamento** 83

Letra jee tu iin jéjníñu castellano jiín mixteco

Jéjníñu ndi'ú'ún vocal mixteco nájnu'un castellano. Te íyó ñinga vocal mixteco jee kúu letra i, nájnu'un:

ndiv <small>i</small>	huevo	kit <small>i</small>	animal
yit <small>i</small>	ocote	ñíñí	granizo

Táká jnú'un jee ndí'i jiín letra n chi ká'án yo jiín xíjni yo te vocal jee iyó núu táká jnú'un kúu nasalizada. Te kuu skíjná'an yó jiín jnú'un jee tu ndí'i jiín n, nájnu'un:

kuáán	amarillo	kuáá	ciego
u' <u>u</u> n	cinco	u' <u>u</u>	doler
ndikin	semilla	ndiki	cuello
kixín	pegajoso	kixí	duerme

Letra x chi je yajni tu kák'a'an castellano nájnu'un mixteco. Te sava jny'un mixteco jee jejníñu letra x kúu táká jee yá'a, nájnu'un:

xini	cabeza	xe'yu	anillo
xu' <u>u</u> n	dinero	uxa	siete

Letra ' mixteco te íyó sonido jee ka'án yo nde sukun yo. Te kuu skíjná'an yó jiín jnú'un jee tu jejníñu letra ', nájnu'un:

ndo'o	tenate	ndoо	caña
sa'ma	tela	sama	cambiar
yu'u	boca	yuu	petate
nde'y <u>u</u>	lodo	ndeyu	comida

Te núu na kóndeka jná'an letra j jiín letra n te jé'e shín sonido, nájnu'un:

jniñu	trabajo	jníñí	ratón
jnu' <u>u</u> n	palabra	vijna	hoy

Jee ndéka jná'an consonante n jiín d chi iin ká'án-ni castellano jiín mixteco. Te castellano tu kéjéé jiín úu consonante un, te mixteco chi íyó, nájnu'un:

ndiv <small>i</small>	huevo	ndute	agua
ndika	plátano	ndeyu	comida

Te letra s jiín ingle consonante jeé ndéka jná'an te letra un chi jéjníñu nde sava jny'un castellano, te mixteco chi kéjéé xí'na ga letra s jiín ingle consonante, chi nájny'un:

sta <u>a</u>	tortilla	skuá'a	estudiar
skáji	dar de comer	stíki	vaca, toro

Íyó tijni jny'un jeé iin téé-ni yó te tono-ni sáma. Chi íyó tono **ALTO, BAJO, MEDIO.**

Te tono ALTO chi téé yó su'va: á, é, í, ó, ú, te ká'án kuíñi yó, nájny'un:

lélú	sombrero	yá'a	está pasando
ndíko	está moliendo	linchí	lagartija

Te tono BAJO kúu jee téé yó su'va: a, e, i, ï, o, u, chi ká'án ká'nu yó, chi nájny'un:

kúñu	carne	ya'a	va a pasar
ndíko	va a enfriarse	oko	veinte

Te tono MEDIO chi tu téé yó chi kuéchi ká'án-ni yó. Te ni tu ká'án ká'nu yó te ni tu ká'án kuíñi yó chi kú'va-ni ká'án yo, nájny'un:

londe	cordero	ya'a	chile
ndíko	va a moler	vílu	gato

Prólogo

Ini Antiguo Testamento iyó kué'ę libro jee steén ndese ni iyo Yaą Dios jiín ñáyuu hebreo. Suni stéén ndese ni chindéé ñá'án yá ñayuu jeę ni skíku i nuu ya te suni stéén ndese ni tají yá castigo nuu ñáyuu jeę tu ní skíku i jniñu jeę ní ndaku ya.

Te libro jeę naní Biblia káni sìkì uú libro jeę naní Antiguo jiín Nuevo Testamento.

Táká libro yá'a nákani sava-ni jnu'un ndese ni iyo jee ní kuva'a ñayiví yá'a jíin suni ndese ni ndajnu'ún yajni ya jiín táká profeta ya. Te núu jnáa ni kuni ni ndi'i sìkì Antiguo Testamento te jeę sá'a ní kúu jee ki'in ní Biblia ni te ka'u ní.

Ya'á kúu libro 5 "Jeę náka'an yo sava jnu'un jeę ka'án Antiguo Testamento." Íyó 11 libro jeę ndí'i. Te libro 1 nde libro 9 ndeé sava jnu'un jeę ka'án Antiguo Testamento. Te libro 10 ka'án sìkì historia jeę ní kuu me'ñú Antiguo jiín Nuevo Testamento. Te suni nuu libro yá'a nani'in yo ḥin diccionario lulí jeę káchi jeku sìkì jnu'un yií gá jeę véji nuu táká libro yá'a jíjná'an. Te suni nuu libro yá'a yí'i mapa jee steén ndé mí ní kuu táká jee yosó núu libro yá'a jíjná'an. Te nuu libro sándí'i na nani'in yo táká índice jeę kúu nandukú yó ndé mí ní'in yo jnu'un jeę kuní yo ka'u yó.

Jee ni kandaku rey Saúl jiín rey David jiín rey Salomón jniñu nuu ñayuu Israel

81. Jee ni tejníñu ya Saúl kuu de rey nuu Israel

(jee ka'án libro 1 Samuel 8:1-13:2)

**Jee ni jík'an ñayuu hebreo jee koo in rey jee
ndaku jniñu nuu de**

Te ná ni je'nu ndasí Samuel te ni tejníñu de uu se'e de kuu juez nuu ñayuu hebreo. Te tu ní kándaku va'a de jniñu nájny'un máá Samuel, chi kájetá'ú de ki'in de xu'ún ñayuu hebreo te sá'a de jee kuní tée un, te tu sá'a de jee yosó núu ley ya. Yukuán na te ñayuu kujé'nu nuu ñayuu hebreo ni jengoo de nuu Samuel. Te ni ka'an de jiín Samuel jee na téjniñu de in ñayuu kuu rey jee ndaku jniñu nuu de jíjná'an de. Te tu kúní Samuel jee koo súkuan. Te ni jík'an ta'ú de nuu Yaa Dios návaa kuni de ndese sá'a de.

Te ni ka'an ya jiín de jee na sá'a de nájny'un kájik'an ñayuu hebreo. Te ni ka'an ya:

—Jee kasá'a de súkuan kúu jee ske'íchí ni de jee maá rí kúu rey. Te kuéé gá ndo'o de jiín rey jee ndonda ndaku jniñu nuu de chi jekondee rey un kák'an de kue'e xu'ún te suni sá'a rey un jéé sájniñu de jee kuu máá rey un. Yukuán na te nakani ni de jee ni jík'an de rey, te ma kúu ga sama koo jiín de jíjná'an de —áchí yá.

Yukuán na te ni je'en Samuel ni kachi de nuu ñayuu hebreo ndese ni ka'an ya. Te tu ní kásá'a

kuítí-ni de cuenta, chi kákuni de in rey nájnu'un íyó táká gá ñuu.

Jee ni ká'an Samuel jee kuu Saúl rey ñuu Israel

Yukuán na te ni ka'an ya jiín Samuel:

—Sá'a jee kájikan ñayuu nuu ro. Te suni stéén ri nuu ro ndé in kuu rey. Hora yá'a sajnē te tají rí in tée jee kúu de yukun Benjamín. Te chu'un ró aceite xini de jee steén jee maá de kuu rey ñayuu hebreo. Te jnama de ñayuu hebreo nuu ñáyuu filisteo —achí yá.

Te súkuan ni kuu. Ìnga kívi un te ni kiji in tée nání Saúl nuu íne Samuel te ni kajny'ún de ndé mí kuu nani'in de burro tátá de jee ní ndoyó kuángoo. Te ni ka'an ya jiín Samuel:

—Tee yá'a kúu jee ní nakaji ri jee konso jníñu de jee kuu de rey xína ñú'lún núu ñáyuu hebreo —achí yá.

Te ni ka'an Samuel jiín Saúl jee ní nanengoo burro un. Yukuán na te ni ka'an de jiín Saúl jee na káji de staq jiín Samuel, chi kívi yúkuán kásá'a de viko jee chiñú'ún de ya.

Yukuán na te kuangoo ndíndúú de nuu iyó in altar, te yukuán ní je'e Samuel nuu Saúl in pedazo ká'nu kúñu jee káji de. Te jee ní kuaa kívi un te ni ka'an Samuel jiín Saúl jee na kéndoo de kusu de ve'e Samuel. Te jené'en ìnga kívi un te ni jengoo ndíndúú de nde yuñúu. Te yukuán ní chu'un Samuel jeku aceite xini Saúl. Te ni ka'an de:

—Máá ró kuu rey jee konso jníñu ró ndaku ró jniñu nuu ñáyuu Israel.

Te ni kachi de ndese koo kívi yúkuán núu Saúl. Te ndí'i jee ni ká'an de jiín Saúl, súkuan ni kuu.



Ni chu'un Samuel jeku aceite xinj Saúl

Te ni kiji Espíritu Yaq Dios siku Saúl nájnu'un sá'a ya jiín taka gá profeta ya. Te ni chindéé ñá'án yá de jee na koo in modo sín jiín de jee na sá'a de jee vá'a. Yukuán na te kuanu'un de ve'e de. Te tu ní káchí kuítí de nuu ñáyuu ve'e de jee ni ká'an Samuel jee kuu de rey. Chi kuéchi jee ni ká'an de kúu jee já ni nani'in tatá de burro de.

Jee ní kuu Saúl rey xína ñú'ún núu ñúu Israel

Yukuán na te ni ka'an Samuel jiín ndi'i ñayuu hebreo jee na ndútútú de ñuu naní Mizpa. Te lugar yúkuán ní kasá'a de suerte náva'a nakaji de ndé in kuu rey. Te jee ní kasá'a de un te ni kane yukun Benjamín.

Te ni kasá'a tuku de suerte te ni kane ñayuu ve'e Saúl. Te sandí'í na jee ní kasá'a de te ni kane máá Saúl. Te ná ni kanandukú de Saúl, te tuú de. Te ni kanani'ín de jee yísá'yú Saúl me'ñú táká ndajníñu. Te ni jeki'in de Saúl.

Yukuán na te ni kachi Samuel nuu ñayuu hebreo ndese jíni ñú'ún sá'a ín rey. Te ni tee de nuu ín tutu jéna'án. Te yukuán na te ni nachuvá'a de ve'e ya. Te ná ni ndí'í te ni natají de ñayuu kuanungoo i ve'e i. Te suni kuanu'un Saúl ve'e de, te kuangoo sava soldado hebreo jiín de.

Te ná ni ya'a nájnú'un ín yoq te ni kakajná'an ñayuu amonita jiín ín ñuu ñayuu hebreo. Te ná ni jini Saúl te ni stutú de kue'e soldado. Te ni chindéé ñá'án Yáq Dios de te ni kuu ni jnama de ñuu un. Te kíví yúkuan ní kuni ñayuu hebreo ka'ni i ndí'í ñayuu jee tu ní kákuni i jee kuu Saúl rey. Te tu ní kúní Saúl sá'a de súkuan, chi ni chindéé ñá'án Yáq Dios de.

Yukuán na te kuangoo ndí'í ñayuu hebreo nde ñuu naní Gilgal. Te yukuán ní kaje'ni i tijní kítí jee ni sóko i nuu ya síkí jee kákuni i koo manj i jíin yá. Te suni ni kandutútú i nuu ní katejníñu i Saúl kuu de rey. Te kíví yúkuan ní kakusíñ ndasí ni i.

**Jee ni ká'an Samuel sandí'í na jnu'un ndeyí jíín
Saúl jiín táká gá ñayuu hebreo**

Te ná káyukú ndí'í ñayuu hebreo ñuu Gilgal, te ni ka'an Samuel sandí'í na consejo. Xína ñú'ún ni je'e de jnu'un nuu ndí'í ñayuu jee na ká'án i táká jée tu va'a ní sá'a Samuel. Te ndí'í ñayuu un ní kaka'an jee tu ní stá'ú Samuel ni ín ñayuu. Yukuán na te ni ka'an de jee na kóku'un ni i jee ni sá'a Yaq Dios jee vá'a jíín tata jíí

i. Ni ka'ān de ndese ni tava yá tata jíi i ñuu Egipto, te yúkuán na te ni je'e ya ñuu Canaán nuu i jíjná'an i.

Te suni ni ka'ān de jee tájní jínu ni kachiñú'ún ñáyuu hebreo yaq tu ndaq. Jee yúkuán ní je'e ya jnu'un jee tájní jínu ni kakanda ñinga ñuu yúkuán jíin i. Te suni ni ka'ān de jee táka gá jínu jee ni siáá i je'e tu chíñú'ún i yaq tu ndaq te ni kachiñú'ún i Yaq Dios, te jee ni jíkan ta'ú i nuu yá jee na chíndéé ñá'án yá i, te ni chindéé ñá'án ndije ya i.

Te ni ka'ān de ñinga jínu jee ní kastívi i je'e ní kajikan i in rey. Te vijna te rey jiín máá i jíjná'an i jíni ñú'ún kondito de jee kuatá'ú de nuu ndí'i ley Yaq Dios. Te sandí'i na te ni jejnu'un Samuel kakán ta'ú de je'e ñáyuu hebreo.

Yúkuán na te ni nakaji rey Saúl uni mil soldado jee kone jíin de jíin sé'e yíi de Jonatán. Te ndí'i ga i ni nandikó i kuanungoo i ve'e i.

82. Jee ní kunj'ni ni rey Saúl nuu Yaq Dios,

te ni ka'ān yá jee ma kúu ga kuu de rey

(jee ka'án libro 1 Samuel 13:3–15:35)

Te ná ni yá'a jeku tiempo te ni stutú ñáyuu filisteo kue'e soldado jee sáty'va de kuajná'an de jíin ñáyuu hebreo. Te rey Saúl jiín soldado de ká'iyo de ñuu Gilgal kándetu de jee na jínú Samuel, chi ka'ni de táká kití jee sokó de nuu Yaq Dios.

Ni ka'ān Samuel jiín Saúl jee jinú de nuu uxá kívi. Te ná ni jinu kívi uxá te tu ní jínú Samuel nuu íne rey Saúl. Yúkuán na te ni jitë níuu sava ñayuu hebreo kuangoo i. Yúkuán na te ni ki'in máá rey Saúl táká kití, ni je'ni de te ni sokó de nuu Yaq Dios.

Te ná ni kunúu jeku te ni jinu Samuel. Te ná ni jini Samuel jee súkuan ni sá'a rey te ni kítì teyí ni de, chi tu ní tá'ú jniñu nuu de sá'a de súkuan. Te ni ka'an de jíín Saúl:

—Vijna jee ni stívi ró ni sá'a ró súkuan te ndukú Yáa Dios inga tée kuu rey nuu ñáyuu hebreo.

Yukuán na te kuanu'un Samuel ve'e de.

Jee ní je'ni Jonatán kue'e soldado filisteo

Te ni kane rey Saúl ñuu Gilgal jiín soldado de, te ni kakoyukú tú'va de jee kuajná'an de jíín ñáyuu filisteo. Te se'e yíí de Jonatán jiín inga tée lulí jé ndító de ndajníñu jee jéjníñu Jonatán nuu kajná'an de, kuangoo de in lugar nuu ká'jin soldado filisteo kándito de me'ñú yuku. Te kúní Jonatán jee chindéé ñá'án yá de náva'a kuu ka'ni de soldado un. Te kúní de jee na stéén Yaaa Dios jee ndaá jee chindéé ñá'án yá de, te sá'a ya jee kuá'a soldado jny'un kaa Jonatán nde nuu ká'jin de.

Te súkuan ni kuu, chi ni je'e soldado jny'un ni kaa Jonatán. Te ni chindéé ñá'án Yáa Dios ni je'ni de soldado ñuu filisteo. Yukuán na te ni kayu'ú jekua ga soldado filisteo, te ni kajite núu de kuangoo de chá'a chúkuan, chi tu jíní kuití de ndese sá'a de.

Te ná ni jito rey Saúl jee súkuan kúu jíín soldado filisteo te kuangoo de chindéé ñá'án de kuajná'an de. Te ni chindéé ñá'án yá de, chi ni kaje'ni de kue'e soldado filisteo.

Jee ni ká'an ni'in Saúl jíín táka soldado de

Te kívi yúkuan ní ka'an rey Saúl:

—Ni in ró má kúu kaji ró nde núu tu ni'in ndí'i yó enemigo yo. Chi núu kaji ndé in ró te kuu ró —achí de.

Te ni kajini só'o ndi'í soldado jee ka'án Saúl, te ni in de tu ní káyeji de kíví yúkuan, vesú kájii ndasí de sóko. Te ni kaya'a de yajni nuu íne in yoko, te ni in de tu ní káseyu'ú de nduxi yoko, chi máá in Jonatán. Chi máá de tu ní jiní de jee súkuan ni ka'an tatá de. Te ni ki'in Jonatán jeku nduxi te ni yeji de.

Te jekuáq yúkuan ní kuni Saúl nandikó de inka jinu te kuajná'an de jíín ñayuu filisteo. Te sutu ni kajnu'ún de Yaq Dios á kuu kingoo de chí tuú. Te tu ní stíkó kuíñí ya ni in jny'un, chi siki jee ní yeji Jonatán jeku nduxi. Yukuán na te ni kasá'a de suerte náv'a nane ndé in kúu jee tu ní skiku jee ni ká'an Saúl. Te suerte un ní kane siki Jonatán. Te íyó tú'va Saúl ka'ni de Jonatán, vesú se'e yíí maá de kúu. Te ni kaka'an ndi'í ñayuu hebreo jee tu jíni ñú'ún kuu Jonatán, chi máá Jonatán kúu jee ní kejéé de xí'na gá ni je'ni de soldado filisteo. Te súkuan ni kaku Jonatán jee kúu de.

Te kújé'nu ndasí Saúl. Te ni stutú de soldado de te ni kajná'an de jíín ndi'í ñayuu jee kájito u'u i ñayuu hebreo. Te vesú súkuan te níní ní iyo jnundó'o jíín de ni sá'a ñayuu filisteo.

**Jee ní ndaku Yaq Dios jniñu nuu Saúl jee na
ká'ni de ñayuu amalecita**

Te ná ni ya'a jeku tiempo, te ni ka'an Samuel jíín Saúl:

—Kúní Yaq Dios jee na kuájná'an ró jíín ñayuu amalecita, te ka'ni ro ndi'í i jíín ndi'í kití ndéka i, chi jíni ñú'ún stáqan ro ndi'í i —áchí Samuel.

Súkuan ni sá'a ya náv'a kua'a ya castigo nuu ñayuu amalecita, chi siki jee ní kakajná'an i jíín ñayuu

hebreo ná ni kendakoo de Egipto te kuangoo de ñuu Canaán. Te súkuan ni sá'a rey Saúl, chi ni stutú de soldado de te ni kakajná'an de jíín ñayuu amalecita. Te ni kakanda de, te ni kaje'ni de ndí'i ñayuu. Te rey ñayuu amalecita chi ni kaki'in de kuangoo de jíín. Te tu ní káje'ni ñayuu hebreo táká kití vá'a, chi ni kaje'ni de kití jee ká'yo xií tí.

Jee ní kuxeen Samuel nuu rey Saúl

Te ni ka'ān ya jiín Samuel jee tu ní jétá'ú Saúl nuu ya. Te nákaní ni ya jee ní jeni ya de kúu de rey. Yukuán na te kua'ān Samuel nandukú de Saúl. Te ná ni nani'ín jná'an de ñuu Gilgal te ni ka'ān xí'na Saúl:

—Ni sá'a ri jee kuní Yaq Dios jee sá'a ri —achí de.



Tu skíku ró nájny'un ndáku ya jniñu

Yukuán na te ni ka'ān Samuel:

—¿Na sīkī kúu jee kánda'yū tāká kīti, nūu súkuán?

Te ni ka'ān Saúl:

—Chi sīkī jee ní nakaji ri tāká kīti vá'a jee sokó ri nuu Yaā Dios. Te tāká kīti jee tu íyó vá'a tī ni je'ni ri ndī'i tī.

Te ni ka'ān Samuel:

—Te jee kúni ni ka'ān Yaā Dios jiín rí jee ma kúu ga rō rey, chi tu skíku ró nájnu'un ndáku ya jniñu. Chi ni ka'ān ya jee ka'ni rō ndī'i ñayuu jiín kīti i. Te máá ró chi tu ní jé'ni rō ndī'i tī.

Te ni ka'ān Saúl:

—Te chí suu ní skíku ri nuu ya, chi ni jengoo ri te ni kakajná'an ri jiín ñayuu amalecita. Te ni je'ni rī ndī'i ñayuu te ni jniñi ri rey ñayuu un véji ri jiín, te tāká gá soldado chi ni kaki'in de máá kīti jee sokó de nuu ya.

Te ni ka'ān Samuel:

—Kánuú gá jee kuatá'ú yó nuu ya, chi jee yúkuán kánuú gá vesú jee sokó yo kīti nuu ya. Chi jee kánuú ndasí gá kúu jee skíku yó nūu ya. Chi tu vā'a jee kúnij'ni ni yo nuu ya, chi kuechi kúu nájnu'un jee sá'a yó jniñu tásí chí nájnu'un jee chiñú'ún yó ídolo. Te ma kuá'a ga ya jnu'un jee kuu ró rey, chi tu ní sá'a ró jniñu jee ní ndaku ya —achí Samuel.

Yukuán na te ni yu'ú rey Saúl, te ni ndukú de jee na kóne ká'nu ni Samuel nuu Saúl. Te ni ka'ān Samuel jee tu sáma jee jéni ni Yaā Dios nájnu'un kásá'a ñayuu. Te tu yá'a kuiti jee nákani ya īnga tēe kuu de rey nuu ñayuu hebreo. Yukuán na te ni je'ni Samuel rey ñayuu

amalecita. Te yukuán na te kuanu'un de ve'e de, te suni kuanu'un Saúl ve'e de. Te tuvá ni kándakoto jná'an ga de. Te vesú súkuan te kúkuí'yá ni Samuel jee ma kúu ga Saúl rey.

83. Jee ní tejníñu ya David nduu de rey ñayuu Israel

(jee ka'án libro 1 Samuel 16:1-13)

Te ni ka'an ya jiín Samuel jee tuvá jíni ñú'ún jéé kukuí'yá ni de je'e Saúl, chi ki'in de chu'un de aceite xini_j ínga tee jee steén jee kuu de rey. Te ni tají yá de ki'in de ñuu Belén jee chu'un de jeku aceite xini_j ín se'e yíí Isaí, in tee jee kuu de yukun Judá.

Yukuán na te kua'an Samuel ñuu Belén. Te ná ni jito de jee sukún te va'a jito se'e yíí núú Isaí, te ni jeni ni de jee téé un kúu jee nándukú de. Te ni ka'an ya:

—Vesú sukún de te va'a jito de te nasuú de kúu. Chi ñayuu chi jito i taká jéé kuu koto i, te máá rí chi jito ri ini taká ñáyuu, te súkuan kúu jeé nákaji ri i.

Yukuán na te ni kana Isaí ná in ná in se'e yíí de, ni kekoo de nuu Samuel. Te ni ka'an ya jiín Samuel jee ni in de tu kúu tee jee nándukú yá. Yukuán na te ni kajnu'ún Samuel Isaí:

—¿Á túva ga ínga se'e yíí ní iyó?

Te ni ka'an Isaí:

—Íyó in na i, te nání i David, te kúu i tee súchí gá. Te íyó i yuku ndító i lanchi.

Te ni ka'an Samuel jee na kána de David kiji. Te ná ni kee David te ni ka'an Yaa Dios jiín Samuel:

—Tee yá'a kúu jee ní nakaji ri. Chu'un aceite xini_j i.

Yukuán na te ni chu'un Samuel aceite xinj David. Te táká gá ñani de un chi kuéchi ndé'e-ni de. Suni va'a jító David, te vivo jító de. Te nde kívi yúkuán te ni iyo Espíritu Yaq Dios jiín de. Yukuán na te ni nandikó Samuel kuanu'un de ve'e de.

84. Jeęní tee David yaa jiín arpa nuu rey Saúl *(jeę ka'án libro 1 Samuel 16:14-23)*

Te tuvá ga ni chíndéé ñá'án yá Saúl. Te ni iyo tijni jínu jeę ni kívi tachị kíni ini de. Te táká téé kásajniñu jiín de ni kaka'an de jeę na ndukú de in ñayuu jeę téé yaa jiín arpa, te núu kívi tachị kíni un ini de te tee i yaa un náv'a chindéé ñá'án jéę koo va'a de. Te in tee un ní ka'an de jeę David kúu in se'e yí Isaí, te téé de yaa jiín arpa. Te ni kana rey Saúl David. Te ná kívi tachị kíni un ini Saúl te téé David yaa jiín arpa de, te ndúsii ni rey.

Te ná ni ya'a jeku tiempo te ni tejníñu de David kondito táká káa jeę jejníñu de nuu kajná'an de.

85. Jeęní je'ni David in soldado filisteo jee sukún ndasí

(jeę ka'án libro 1 Samuel 17:1-18:5)

Jeęni jító ndee Goliat soldado hebreo

Te in kívi ni kasátu'va soldado ñayuu hebreo kajná'an de jiín soldado ñayuu filisteo, te káyukú máá de yata yúku te ichi núu de ká'jin soldado filisteo. Te ni kane in soldado filisteo jeę jító ndee de soldado ñayuu hebreo. Te nájny'un unj metro jeę sukún de, te ñú'un de sa'ma káa, te nání de Goliat.

Te kána ndee de jiín ñayuu hebreo jeę na nákaji de in tee jeę na kuájná'an jiín de. Te núu kanda Goliat te

ñayuu filisteo ndaku jniñu nuu ñayuu hebreo. Te núu ni kanda soldado hebreo, yukuán na te ñayuu hebreo ndaku jniñu nuu ñayuu filisteo. Te káyu'ú ndasí soldado ñayuu hebreo, te tu ni in de kún^deyí ni ki'in kuajná'an jíín Goliat.

Jeee ni ká'an David jeee kuajná'an de jíín Goliat

Te íyó úni ñani jéva'a David jeee kúu de soldado rey Saúl. Te máá David chi jíka de ndító de lanchi tátá de. Te in kívi te ni ka'an Isaí jíín David jeee na kí'ín deconde'é de ndese íyó ñani de, jíín jée na kí'ín de kindeka de jeee kájí ñani de.

Te ná ni jinu David nuu káyukú de te je ni ya'a ví'yá ga in yoo jeee ká'lin de jeee táka-ni kívi jíto ndee Goliat ñayuu hebreo. Te ná ni jini David jeee súkuan kúu te ni ka'an de jeee tu kánuú jée koto ndee tee un soldado ñayuu jeee kandíje Yaq Dios. Yukuán na te ni ka'an de jeee ki'in maá de kuajná'an de jíín Goliat.

Te ná ni jini Saúl te ni kana de David, te ni ka'an de jíín David:

—Ma kúu ki'in ro kuajná'an ro jíín de, chi kúu de in soldado jeee jiní kuajná'an. Te ro'ó chi kúu ro in tee lúlí te ná tu kuni ro kuajná'an ro.

Te ni ka'an David:

—Máá ná chi ndító ná lanchi tátá na. Te ni je'ni na ndíka'a jíín oso jeee kuní tq ka'ni tq lanchi tátá na. Te ni ndito Yaq Dios sañá. Te suni jíní na jée kón^dito ya sañá núu ki'in na kuajná'an ná jíín Goliat —achí de.

Jeee ní je'ni David Goliat

Yukuán na te tuvá na jnu'un ní ká'án rey. Te ni je'e de sa'ma káa jeee na kú'un David. Te David chi tu kúu



Ni kakuyajni jná'an David jiín Goliat

kuajníñu de sa'ma káa un, te ni tava de. Te ni je'en de
in yute lúlí te ni ki'in de u'un yuu kavá. Te ni chu'un
de nuu nínu de, te kua'an de nuu íne Goliat jee
kuajná'an de jiín téé un. Te tu na ndajníñu jeę jejníñu
soldado kua'an de jiín, chi máá yoyuú-ni de kua'an de
jiín.

Te ná ni jito Goliat jee véji David te ni jekü katá-ni
de. Te ni ka'an David:

— Yaę Dios ndaaę jee káchiñú'ún rí jiín náyuu hebreo,
chindéé ná'án yá ru'u. Te kivi yá'a koto ndi'i nayuu jee
chindéé ná'án ndije ya ru'u jijná'an ri —achí de.

Te ni jika Goliat kúyajni de nuu David. Te suni David ni jika de kúyajni de nuu Goliat. Yukuán na te ni ki'in de in yuu jee íne nuu ñínu de, te ni chune de nuu yóyuú de. Te ni kava núu de yoyuú de, te ni skiín de yuuu, te ni jnaa maá ndáa jne'en Goliat, te ni kotúú-ni kua'an. Te ni jinu David nuu íne Goliat, te ni je'nde de xinj jiín espada jee ndíso máá Goliat.

Yukuán na te ni kayu'ú ndasí soldado filisteo, te ni kajinu de kuangoo de. Te ni kasondíkín soldado ñayuu hebreo nde ni jinungoo de nde ñuu ñayuu filisteo. Te ni kaje'ni de kue'e soldado un.

Te ná ni jito rey Saúl jee súkuan ni kuu, te ni jikan de nuu Abner, jee kúu de tee jee ndáku jniñu nuu ndí'i soldado ñayuu hebreo, jee na kíki'in de David. Te súkuan ni sá'a Abner. Te ná ni jinu David nuu rey, te née de xinj Goliat ni kee de jíín. Te ni ka'an Saúl jee na kéndoo David jiín de. Te ni ka'iyo manj se'e yií de Jonatán jiín David, te ni soko de espada de nuu David.

Te nde kívi saá te ni tají rey Saúl David ki'in de nuu kákajná'an soldado, te va'a ni kajná'an de. Te kákusií ni ndí'i ñayuu jee jíni so'o jee kúndehyí David nuu je'én de kákajná'an de. Te suni kákusií ni taká gá tee kándiso jníñu nuu soldado Saúl.

86. Jee ní kukuñí rey Saúl jiín David, te kúní de ka'ni de David

(jee ka'án libro 1 Samuel 18:6–20:42)

Te in jínu jee ní nandikó David jee ni jé'en de ni je'ní de kue'e soldado filisteo te ni kanengoo taká ña'an hebrea kájita ña te kájita jé'í ña. Te ná ni kanajná'an ña jíín soldado ñayuu hebreo, te kájita ña

je'ę rey Saúl jiín David. Te káka'ęn ña jee Saúl ni je'ni kue'ę mil ñayuu jee kúu enemigo, te David ni je'ni de uxí jínu kue'ę ga.

Te ná ni jini so'o Saúl te ni kitx ndasí ni de, chi ni jeni ni de jee tu na'án te kuni ñayuu jee na kívi David kuu de rey. Te nde kívi yúkuan te tuvá ga ni kandíje de David.

Jee ní kuni Saúl ka'ni de David

Te inga kívi te ni jekondee stá'ęn tuku tachi kíni Saúl, te téé David yaa jiín arpa de. Te níní jée téé David yaa te jnii Saúl in lanza, te ni skuikó de uu jínu siki David. Te ni jexin-ni David maá de ndindúú jínu un, te tu ní stújí lanza un de.

Te ni jini Saúl jee chindéé ñá'án Yá Dios David, te tuvá chindéé ñá'án gá ya Saúl. Te ni nayu'ú de. Te ni tejnínu de David siki ín grupo soldado náva'a ka'ni ñayuu filisteo de nuu ki'ín de kuajná'an de. Te kanda David nuu ndí'i taká enemigo jee kákajná'an jíin de, chi chíndéé ñá'án yá de. Te nde kívi yúkuan chi yú'ú Saúl jíto de David. Te ni kajetá'ú ndí'i ñayuu hebreo nuu David.

Te yukuán na te ni jeni ni Saúl ndese sá'a de náva'a kuu David. Mical kúu se'e sí'i xéjnu Saúl te kúu ni ña David. Te ni je'e Saúl jny'un jee kúu nanda'a David jiín Mical. Te ni sá'a de jee táka gá tee jee kándiso jnínu ka'án de jíin David jee na kuátá'ú de jee ka'án Saúl. Te tu ní kúní David nanda'a de jíin sé'e rey, chi tu kújé'nu de. Te ni kaka'ęn tee kándiso jnínu:

—Jee kuní rey kúu jee na ká'ni ro in ciento tee filisteo, te kuą'a de se'e sí'i de nuu ro.

Chi jéni ni Saúl jeę ñáyuu filisteo ka'ni David, te súkuan te naa tęe jee jéni ni de jeę kúu enemigo de.

Ni jetá'ú David jeę ka'án rey, te ni je'en de ni je'ni de uu ciento tęe filisteo. Yukuán na te ni nanda'a David jiín Mical. Te ni nayu'ú téyí gá Saúl, chi ni jito de jeę sé'e sí'i de kúu ndije ni ña David, te chíndéé ñá'án yá David.

Jee ní chindéé ñá'án Jonatán David

Yukuán na te ni jeni ni Saúl ka'ni de David. Te ni kachi de nuu táká ñáyuu ve'e de jiín núu ñáyuu ndáku jniñu. Te se'e yíi de Jonatán chi manj de jiín David. Te ni kachi de nuu David jny'un jeę ni ká'an tatá de.

Yukuán na te ni ka'an Jonatán jiín tátá de jeę ma ká'ni de David, chi va'a sá'a de. Te ni ka'an rey jeę ma ká'ni de David núu súkuan. Te kúu ga David soldado Saúl, te ni kakajná'an de jiín ñáyuu filisteo te ni kundeyí de jiín i.

Jee ní jinu David kua'an de

Te yukuán na te tachj kíni un ní stó'o tuku Saúl. Te tée David yaa jiín arpa de jeę jíni so'o rey. Te ni skuikó tuku rey un lanza de síkí David. Te ni ndonda David ni jinu de kua'an de ve'e de. Te ni ka'an ñasi'i de Mical jeę jíni ñú'ún kunu de, chi núu tuú te jekuáq yúkuan ka'ni tatá ña de. Te je ni tají Saúl tęe jee kóndito ve'e nuu néne David. Yukuán na te ni stúun Mical David chi ventana. Te nuu jíto ña ni jekin ña iin jeę káa ná modo ñayuu. Te ni jesí ña tıkachi síkí náva'a kani ni ñayuu jeę katú David kixí de.

Te tęe jee kasájniñu de nuu Saúl, ni kívíkoo de ini ve'e jeę jníi de David ki'jn de jiín. Te ni ka'an Mical jeę



Ni skuikó rey Saúl lanza de siki David

katú de kú'ú de. Te ná ni jini rey jeé ni stá'ú sé'e de Mical de, te ni kití ni de te ni kuxeeñ de nuu ña. Te ni ka'an yaá ña, chi ni ka'an ña jeé ni ká'an David jeé ka'ni de ña núu tu chindéé ñá'án ña de kaku de.

Te ni kaku David te kua'an de konde'é de Samuel. Te ni kachi de nuu Samuel ndi'í jeé iyó. Te nándukú Saúl David te tu ní náni'in de.

David jiín Jonatán

Yukuán na te ni najná'an David jiín téé jeé maní ni de jiín kúu Jonatán, te ni kajnu'ún de:

—¿Na siki kúu jeé kití ni tatá ro jíto de ru'u? —achí de.

—Tu ndaaq jeeq kití ni tatá rí jíto de ró'ó —áchí Jonatán.

Te ni ka'qan David:

—Jíní va'a ri jeeq kití ni de jíto de ru'u, te ma káchi de nuu ro chi jíní de jeeq maní ni ro jiín rí.

Yukuán na te ni tají David Jonatán jeeq na kí'ín de kajnu'ún de núu jeeq ndaá jeeq súkuan kúu, te nandikó de kachí de nuu David. Te ni jejnu'un Jonatán jeeq kachi de núu jeeq ndaá kúu. Te súkuan ni kuu, chi ni jini Jonatán jeeq kuní tatá de ka'ni de David. Te ni je'en yu'u-ni de ni kachi de nuu David. Te vesú súkuan kúu te ndindúú de ni jejnu'un de jeeq koo maní de níí káni-ni, te ndindúú de kondito jná'an de taká sé'e de jijná'an de. Yukuán na te kua'qan David, chi ni jini de jeeq jíní níú'ún kunu de náva'a kaku de.

87. Jeeq ní jinu David ni jito de rey Saúl, te kue'qe ñayuu ndikín de (jeeq ka'qan libro 1 Samuel 21-23)

Jeeq ni je'en David nuu sutú Ahimelec

Te ni jinu David jeeq yu'ú de nuu Saúl. Te ni jekonde'é de sutu jeeq naní Ahimelec, te ni jikan de pan kaji de. Te ni jito Ahimelec jeeq ni jinu mañu'ún-ni David, te ni kajnu'ún de na sikuu kúu. Te ni sta'ú David, chi ni ka'qan de jeeq jíka de skíku de in jniñu sa'yú rey Saúl.

Yukuán na te ni ka'qan Ahimelec jeeq iyó máá pan iñ-ni jeeq ní koyukú núu mesa ini ve'e ya. Te máá in-ni máá sútu kúu jeeq kúu kaji pan un. Te vesú súkuan te ni je'u de pan un núu David náva'a konee de nuu táká téé jeeq ká'iin jíin de te kaji taká de jijná'an de.

Te ni kajnu'ún David Ahimelec, á tu néva'a de in espada chí in lanza. Te ni je'e Ahimelec espada je'e ní kuu cuenta Goliat. Te ni ki'in David pan jiín espada kua'an de jiín.

Jee ní ndutútú kué'e tée hebreo jiín David

Te ni jinu de in ñuu filisteo naní Gat ni ndoo de jeku tiempo. Yukuán na te ni kenda de ñuu Gat, te ni je'en de in yavu kava nání Adulam. Te ná ni jini táká ñáyuu ve'e de, te ni jengoo de ni kanajná'an de jiín David. Te kue'e tée jee kátavu de chí jee néva'a de ina jnundó'o jiín rey, suni ni kataka de jiín David. Te ni kandutútú nájnu'un kuun ciento tée jiín David.

Te ni ki'in David tatá de jiín náná de te ni je'en de jiín núa rey ñuu Moab, chi yukuán konene va'a seguro tatá de. Yukuán na te profeta jee naní de Gad ni ka'an de jiín David jee na kénda de kava un te ki'in de yuku jee kúu cuenta ñayuu hebreo jee kúu yukun Judá.

Te ndi'i tiempo ni nandukú Saúl David, te tu ní náni'in de. Te ni kití ni de jiín taka tée ndáku jniñu, chi tu ní kákachi de jee vá'a ni kakijná'an David jiín Jonatán.

Jee ní je'ni Saúl táká sútu

Te ni iyo in tée ñuu Edom jee naní Doeg, te jéjníñu de nuu rey Saúl. Te íyó de ve'e ya ná ni jinu David ni jikan de pan jiín espada. Te ndi'i ni kachi de nuu Saúl. Te ni tají rey ni kana de Ahimelec, te ni kuxeen de nuu Ahimelec siki jee ní chindéé ñá'an de David. Te ni ka'an Ahimelec jee ní chindéé ñá'an de David chi siki jee kúu de tée sájniñu nuu rey, te vesú súkuan te ni ndaku Saúl jniñu jee na kúu Ahimelec jiín ndi'i ga táká

gá sutu jiín ndi'li ñayuu ve'e de jiín súchi lúlí jiín táká kiti. Te tu ní kúní soldado un sá'a de súkuán. Te ni ndaku Saúl jniñu nuu Doeg jee ka'ni de táká sútú un, te ni sá'a de.

Te ni kaku máá in-ni Abiatar jee kúu se'e yií Ahimelec. Te ni je'en de ni nandukú de David. Te ni ka'an David:

—Núu nandukú rey ndindúú yó jee kúu yo, te va'a ga kendoo ró jiín rí.

David jiín ñayuu ñuu Keila

Te kiví un chi kákajná'an ñayuu filisteo jiín ñayuu hebreo jee kákuu de ñuu Keila. Te ni kakajná'an David jiín ñayuu filisteo, te ni chindéé ñá'án Yaq Dios de te ni kakanda de. Te ni jini Saúl jee iyó David ñuu Keila. Te ni sáty'va de jee ki'ín de jnií de David. Yukuán na te ni kajnu'ún David Yaq Dios jee kastu'ún yá ndese sá'a de. Te ni steén ya nuu David jee sáty'va Saúl jee ki'ín de ñuu Keila, te nachi'i ñayuu ñuu Keila David nda'a rey núu ndoo de ñuu un.

Yukuán na te ni kenda David ñuu Keila jiín táká gá tee, te ni kajika de chá'a chúkuán. Te ná ni jini Saúl jee ní kenda David ñuu Keila te tuvá ni jé'én ga de. Te je ni stutú David iñu ciento tee jee kuajná'an.

Te núu-ni núu-ni ni nandukú Saúl David. Te tu ní jé'e Yaq Dios jnu'un jee náni'in de David.

Jee ni ká'an Jonatán jiín David

Te in kiví te ni je'en yu'u Jonatán ni konde'é de David. Te ni ka'an Jonatán:

—Ma yu'ú ró, David, chi ma kúu ka'ni tatá ri ro'ó. Te in kiví te máá ró nduu rey ñuu Israel, te ru'u nduu

ri in tee jee chindéé ná'án rí ro'ó. Te jíní tatá rí jee
súkuan koo —áchí de.

Te David jiín Jonatán ni kajejnu'un de jeę kóyukú vá'a de níí káni-ni. Yukuán na te ni nandikó Jonatán kuanu'un de ve'e de.

Te ni jika David ni chisa'yú de máá de yuku. Te taqká ñáyuu jee káyukkú yajni te kájini de nuu íne David, te ni kajejnuun de jee chindéé ñá'án de rey Saúl, náva'a jnii de David. Te ná ni jini David jee súkuan kúu, te ni kenda de kua'an de jíín táká gá tee. Te rey Saúl jiín soldado de, ndíkín de David. Yukuán na te ni jinu in tee ni kachi de nuu rey Saúl jee ñáyuu filisteo kákajná'an de jíín ñáyuu ñuu Israel. Te ni siaá de jee nándukú de David, te ni je'en de ni kakajná'an de jíín ñáyuu filisteo.

**88. Jeę ni íyo uu jínu jeę kuu ka'ni David rey
Saúl nuú, te tu ní sá'a de**
(jee ka'án libro 1 Samuel 24-27)

Jee ni íyo in jínu jee kúu ka'ni David rey Saúl nuú

Te ná ni jínu jee ní kakajná'an rey Saúl jiín ñáyuu filisteo, te ni nandikó de ni nandukú tuku de David. Te ni ni'in de jny'un nuu iyó David. Te ni nakaji de uni mil tée hebreo kua'an de jíín. Te káyisa'yú David jiín táka gá tée ini yavu kava. Te ni kiví Saúl yavu kava un jéé teté de. Te ni kaka'an ñayuu ká'iin jíín David jee víjna te kuu ka'ní de rey un yúkuan. Te tu ní kúní de sá'a de súkuan, chi Saúl kúu ga de rey nuu ñáyuu hebreo, te kúu de nájny'un ñayuu kujé'nu nuu David. Kuechi ni jika nde'e-ni de te vii-ni ni je'nde de yu'u sá'ma rey.

Te ná ni kane Saúl yavu kava te ni kujíká de kua'an de, te ni kane David te kána de. Te ni jexin de máá de nde nuu ñú'un chi núu íne rey, te ni steén de yu'u sá'ma rey jeę ní je'nde de. Te ni kachi de jeę kúu ka'ní de rey un núú, te tu ní sá'a de. Te ni ka'an de jee sándaq Yaq Dios ndé in de kúu jeę iyó kuéchi. Te ná ni jini so'o Saúl jeę ka'an David súkuan te ni kukuí'yá ni Saúl. Te ni ka'an de:

—Tee ndaq kúu ró, David, te tu ní sá'a va'a ri jiín ró. Te shín sá'a ró núu taká gá ñayuu, chi tu ní jé'ni ro ru'u, yesu ndúkú ri ka'ní ri ro'ó núú. Te sá'a Yaq Dios



Ni steén David yu'u sá'ma rey jeę ní je'nde de

jee vä'a jíín ró, te jíni rí jee maá ró nduu rey ñuu Israel. Te níni jéé ndaku ró jniñu nuu ñáyuu hebreo te nani'ín ndeyí ni i te koo jee vä'a jíín i. Te suni kuajnu'un ró jéé sá'a ró jéé vä'a jíín ñáyuu ve'e ri —achí Saúl.

Te ni jejnu'un David jee sá'a de súkuan. Te yukuán na te kuanu'un rey Saúl ve'e de. Te David jíín táká gá tée ni kakendoo de nuu ká'jin sa'yú de yuku un.

Te ni ya'a jekua gá tiempo te ni ji'i profeta Samuel. Te ndí'i ñayuu hebreo ni kakukuí'yá ni i jee ni ji'i Samuel.

David jíín Nabal

Te ni iyo in tée kúká nání Nabal. Te kívi jee sáteé de lanchi de te ni tají David táká tée kua'an de konde'é de tée un náva'a soko Nabal jeku jee káji de jíjná'an de. Te ni ka'an David:

—Ka'an ro jíín tée un jee táka jínu jee ni íyo yajni kiti ndéka de jíín yó, te tu na vé ni sá'a yó jíín táká kiti ndéka de.

Te tu ní kíji kani ni Nabal jnu'un vä'a, te tu na vé ni jé'e de.

Yukuán na te ni kití ni David ni jito de Nabal, chi tu ní sá'a de cuenta jee vä'a ni sá'a David jíín táká tée kándito lanchi de. Te ni ka'an David jíín tée jee iyó jíín de jee na kótü'va de, chi kuajná'an de jíín Nabal siki jee tu na vé ni jé'e de.

Te íyó ñasi'í Nabal naní ña Abigail. Te luu káa ña te listo ña'an kúu ña. Te in tée jee sájniñu jíín Nabal ni kachi de nuu ña jee súkuan ni tají Nabal jnu'un kua'an

nuu David. Te ni kiji jeē ní jeni ni ña jeē vá'a ga kúu jeē na tájí ña jeē káji David. Yukuán na te ni stutú ña kue'e jeē káji de jíjná'an de. Te ni soó ña siki burro, te kua'an ña konde'e ña David. Te ná ni najná'an ña jíín de te ni je'e ña táká ndajníñu un núu de. Te ni ka'ān ña jeē vá'a ga ki'in de táká ndajníñu vesú jeē ka'ni de Nabal jiín táká gá ñayuu jeē iyó ve'e de. Te ni jeku'un ni David jeē ndaá ka'án Abigail, te ni ki'in de táká ndajníñu un, te tuvá ni jé'en de stá'ān de Nabal.

Te ná tu ya'a ni xa'un kivi te ni ji'i Nabal. Te ni jeku'un ni David jeē ni jé'e Yaq Dios castigo nuu Nabal. Yukuán na te ni ka'ān David jiín Abigail jeē na nánda'a ña jíín de. Te ni jetá'ú ña, te ni nanda'a ña jíín de. Abigail jiín Ahinoam kúu uu ñasi'i David jeē névá'a de jeē ní kane de jínu de nuu rey Saúl. Mical jeē ní kuu ñasi'i núu de, ni je'e Saúl ña nuu ínga tee.

Jeē ni íyo ínga jínu jeē kúu ka'ni David rey Saúl nuu

Te ni sama jeē jení ni Saúl, te nándukú tuku de David jeē ka'ni de. Te ni stutú de uní mil tee jee nándukú de David. Yukuán na te ni tají David táká tee jeē nándukú ndé mí yúku Saúl jiín táká soldado de. Yukuán na te kua'ān David jiín in tee jeē íne jíín de nde nuu káyukú Saúl jiín soldado de jíjná'an de. Te ni je'e Yaq Dios jnu'un jeē ndí'i tee jee kájin jíín rey ni jinu naa ma'na núu de, te ni in tu ní jíní jeē ni jinungoo de.

Te tee kua'ān jiín David ni kuni de ka'ni de Saúl. Te tu ní jé'e David jnu'un, chi ni ka'ān de jeē Yaá Dios kúu jee sándaq ndese koo jíín Saúl. Te ni kaki'in de tindo'o ndúte jíín lanza Saúl. Te ni kakoo de xini in yuku jeē íne jíká jeku.



Ni kaki'in David tindo'q ndúte jíin lanza Saúl

Te nde xinj yúku un te ni kana David xinj Abner, je_q kúu de t_ee ndáku jniñu nuu_q soldado Saúl. Te ni jeku_q katá de te ni ka'_{an} de jee_q jíni ñú'ún kondito va'a ga de rey. Te ni ka'_{an} David jiín Abner je_q na kóto de, chi tuvá tindo'q ndúte jíin lanza rey iyó jíin de. Te ni nakuni Saúl tachí David. Te ni ka'_{an} de jíin David. Te ni ka'_{an} David:

— Tu ni in jínu ní jéni ni na sá'a ná táka jé_q tu va'a jíin ní. Te s_ik_i yúkuán tu jéku'un ni na na s_ik_i kúu jee_q nándukú ní sañá jé_q ká'ni ni sáña — áchí de.

Y_ukuán na te rey Saúl ni jik_an de jnuká'nu ni nuu_q David. Te ni ka'_{an} David:

— Tají ní in t_ee na kínuki'in de lanza ní.

Te suni ni ka'an de jee na kóndito ya maá de nájnu'un ni kondito de Saúl jee tu na vé ni sá'a de jíin.

Yukuán na te kuanu'un Saúl ve'e de, te ni ndikó David jiín táka téé ká'jin jiín de kuanungoo de nuu ká'ijo de.

Jeé ní konene David ñuu Siclag

Te David chi tuvá kandíje de Saúl. Te ni tee de kua'an de ñuu filisteo jee naní Gat. Te kua'an de jiín ndindúú ñasi'í de jiín ndi'i taká téé jee jíka jiín de. Te ná ni jini Saúl jee súkuan kúu, te tuvá ni nándukú de David. Te ni je'en David ni ka'an de jiín rey ñuu Gat jee na kuá'a de in lugar nuu koyukú de.

Te ni je'e rey un in ñuu lulí nání Siclag nuu ní konene David vi'yá ga in kuiya. Yukuán na te ni jengoo David jiín táka gá tée ni kakajná'an de jiín táka gá ñuu jee jíto u'u ni i ñayuu hebreo. Te káje'ni de ndi'i ñayuu, te kéndo de jiín ndajníñu jiín kití ñayuu un. Te stá'ú David rey ñuu Gat, chi ká'án de jee je'en de kájná'an de jiín ñayuu ñuu hebreo jiín táka gá ñuu jee kijná'an va'a jiín ñayuu hebreo. Te ni jeni ni rey un jée ñayuu hebreo ni kanduu i ñayuu kájito u'u ni David.

89. Jeé ni jí'i rey Saúl jiín sé'e yií de nuu ní kakajná'an de

(jee ka'án libro 1 Samuel 28-31; 1 Crónicas 10)

Te ni kastútú ñayuu filisteo soldado jee kuajná'an de jiín ñayuu hebreo. Te kúní rey ñuu Gat jee David jiín táka gá tée jee iyó jiín de, na ndúu unuú de jiín soldado filisteo náva'a kuajná'an jiín ñayuu hebreo. Te ni ka'an David jee kuu.

Jee ní ndakune'en Saúl anuá Samuel jee na chíndéé ñá'án de

Te níní jee kándutútú de jee kuajná'an de jíin ñáyuu hebreo, te suni ni nastútú Saúl soldado de. Te ná ni jito de jee iyó kué'e ndasí soldado filisteo te ni nayu'ú de. Te ni jikan de nuu Yaq Dios jee na stéén ya ndese koo. Te tu na vé ni steén ya, ni tu ní skóto ya jeni nuu de, ni tu ní jéjníñu ya yuu jee kájejníñu sutu nuu kasá'a de suerte, ni tu ní stéén ya nuu profeta.

Jee yúkuán kúní Saúl ki'in de nuu ín ña'an jee ndákune'en ña ánuá ndiyi náva'a kachi ña ndese sá'a de. Te máá Saúl chi je ni stáan de ndiyi ñayuu jee ndákune'en ánuá ndiyi, te tuvá iyó ñáyuu un ñuu Israel. Te ni kachi ñayuu jee sájniñu jíin de jee iyó ín ña'an jee ndákune'en ánuá ndiyi, te ndéé ña ñuu Endor.

Yukuán na te ni nasama Saúl maá de náva'a yóna nakuni de. Yukuán na te ni je'en de ni konde'é de ña'an un. Te máá ña chi tuvá kuní ña ndakune'en ña ánuá ndiyi, chi yú'ú ña jee sánaa te kuni Saúl te ka'ni de ña. Te ni ka'an Saúl jee ma yú'ú ña chi yóna kuni. Te ni jikan de jee na kána ña ánuá ndiyi Samuel. Te ná ni jito ña nuu Samuel te ni nakuni ña jee maá de kúu rey Saúl. Yukuán na te ni kajnu'ún ánuá Samuel nuu Saúl:

—¿Na siki kúu jee stá'an ro ru'u?

Te ni ka'an Saúl:

—Íyó jnúndó'o xeen nuu rí, chi kájná'an ñayuu filisteo jiín rí, te tu stéén Yaq Dios ndese koo. Jee yúkuán ní kana ri xini ro náva'a kachi ro ndese sá'a ri —achí de.

Te ni ka'an anuá Samuel:

—Ni tu ndé jéjníñu jeę kájnu'ún ró ru'u, chi ni stóo ndá'ú yá ro'ó sikı jeę tu ní jétá'ú ró jniñu ní ndaku ya jeę ká'ni ro ndi'ı ñayuu amalecita. Te nájnu'un ni ka'an rı jiín ró jeę ma kúu ga ro rey, te sajnę te kanda ñayuu filisteo jiín ró, te kuu ro jiín sé'e yíı ró —achí Samuel.

Te ná ni jini so'o Saúl tałká jnú'un yá'a te ni yu'ú téyí de.

Jeeę tu ní jé'e ñayuu filisteo jeę ki'ín David jiín de nuu kuajná'an de jíjná'an de

Te ná ni ndutútú ndi'ı soldado filisteo te jekua ga rey ni kaka'an de jiín rey ñuu Gat jeę ma kuá'a de jnu'un jeę ki'ín David jiín táka gá tee jiín de. Chi yú'ú de sanaa te nuu kákajná'an de jiín ñayuu hebreo te nandikó kóo David sikı ñayuu filisteo te chindéé ñá'lán de ñayuu hebreo. Yukuán na te ni sá'a rey ñuu Gat jee na nándikó David jiín táka tee un ñuu Siclag.

David jiín ñayuu amalecita

Te ná ni najinu de te ni jito de jeę jé ni kakajná'an ñayuu amalecita jiín ñayuu ñuu Siclag, te ni kaki'in de ndi'ı ndajníñu David jiín suni ndajníñu tałká jná'an de jiín ñasi'ı de jiín sé'e de. Te suni ni kaje'mu ve'e de. Te David ni kajnu'ún de ya, á kí'ın de sondíkín de tee un. Te ni ka'an ya jeę ki'ín de. Yukuán na te kuangoo de, te ni kanajná'an de jiín ñayuu un. Te ni kaje'ni de kue'ę ñayuu un, te ni nastútú de ndajníñu de jiín ñasi'ı de jiín sé'e de jiín kítı de jeę ní kakende ñayuu amalecita un. Te ni tají David jeku ndajníñu jiín kítı nuu ñayuu kujé'nu yukun Judá, chi suni kúu David yukun Judá.

Jee ni jí'i rey Saúl nuu ní kakajná'an de

Te jeé ní nastíkó rey Gat David jiín táka téé íyó jiín de, te ni kakajná'an ñayuu filisteo jiín ñayuu hebreo te ni kakanda de te ni kaje'ni de kue'e ñayuu hebreo. Te ni kastújí de Saúl, te ni je'ni de máá de chi ni sínga de máá de síki espada de. Te suni ni kaje'ni de ndinúní sé'e yií Saúl. Te súkuan ni ji'i Saúl síki jeé tu ní jétá'ú de nuu Yaq Dios jiín síki jeé ni je'en de nuu ña'an ndákune'en ánuá ndiyí.

90. Jee ní nukuiñí David kuu de rey ñuu Israel

(*jee ka'án libro 2 Samuel 1–6; 8–10; 1 Crónicas 11–16; 18–20; 26:29–27:34*)

Te ná ni ji'i Saúl jeé ní kakajná'an de jiín ñayuu filisteo, te kua'an in tée ñuu Siclag nuu néne David. Te ni kachi de ndí'i na vé ni kuu. Te ná ni jini David jeé ni jí'i rey Saúl jiín sé'e yií de Jonatán te ni kuku'yá ndasí ni de. Te ni tava de in yaa jee núku'un ni de Jonatán jiín Saúl, chi Jonatán ni kuu in tée jeé vá'a ni kijná'an de jiín, te Saúl ni kuu de rey xína ñú'ún ñuu Israel.

Jee ní tejníñu ñayuu ñuu Judá David jeé kuu de rey

Yukuán na te ni ka'an ya jiín David jeé na nándikó de ñuu Hebrón jeé kéndqo nuu ñú'un jeé ní kakuu ta'u yukun Judá. Te ni je'en de ñuu Hebrón. Te tée yukun Judá ni kachu'un de aceite xiní David jeé steén jeé kuu de rey yukun Judá.

Jee ní tejníñu Abner Is-boset jeé kuu de rey ñuu Israel

Te tékú ga Abner, jeé ní kuu de tée ndáku jniñu nuu ndí'i soldado Saúl. Te ni ki'in de Is-boset jeé kúu



Ni tee ñayuu ñuu Judá jniñu siki David jeę kuu de rey de se'e yií Saúl, te ni tejnínu de jeę kuu de rey ñuu Israel. Te ndáku Joab jniñu nuu ndí'i soldado David, te ndáku Abner jniñu nuu ndí'i soldado Is-boset. Te ni kakajná'an soldado David jiín soldado Is-boset, te ni kanda soldado David. Te soldado David ni kasondíkín de soldado Is-boset nde ni kuaa. Te ni je'ni Abner Asael, ñani Joab.

Te na'án ní kakajná'an ñayuu David jiín ñáyuu Is-boset. Te káa ga kujé'nu David kua'an de.

Jeę ní jeni ni Abner chindéé ñá'án de David

Te in kiví ni kuxeen Is-boset nuu Abner siki jeę ni kíxi de jiín ña'an jeę ní jika tátá de Saúl jiín. Te ni naxeen ni Abner, te ni jeni ni de jeę chindéé ñá'án de David. Te ni tají de tée kájny'ún de David núu kuu nduu unuu de. Te ni ka'an David:

—Kuu núu súkuan. Te máá ró jiín Is-boset jíni ñú'ún nakuä'a ró ñasi'i rí Mical —achi de.

Te Is-boset jiín Abner ni nakuä'a de ñasi'i David.

Yukuán na te ni je'én Abner nuu David. Te ni ka'án de jee kúu chindéé ná'án de jee na kuátá'ú ñayuu hebreo nuu David.

—Te íyó vá'a núu súkuan —áchí David.

Yukuán na te kua'án Abner.

Jeé ní je'ni Joab Abner

Te ná ni nandikó Joab jee ni jé'én de ni kakajná'an de jíín in ñuu, te ni jini de jee ni ká'án va'a David jiín Abner te tu na vé ni sá'a de jíín. Te ni kit̄i ndasí ni Joab. Te ni tají de ñayuu jee na ká'án jiín Abner jee na nándikó de. Te tu ní káchí kuit̄i de nuu David. Te ni ka'án de jíín Abner jee kuní de ndajnu'ún ndindúú máá-ni de. Te ná ni kendoo ndindúú máá-ni de te ni je'ni de Abner, chi sīk̄i jee ní je'ni Abner ñani de Asael ná ni kakajná'an de.

Te ná ni jini David jee ní je'ni Joab Abner, te ni kit̄i ni David. Te ni ndaku de jniñu jee ndí'i ñayuu nde maá Joab koo kuí'yá ni i jee ni jí'i Abner. Te ndí'i ñayuu ni jini i jee tu na kuéchi David ni íyo jee ni jí'i Abner.

Jeé ní je'ni ñayuu Is-boset

Te ná ni jini Is-boset jee ni jí'i Abner te ni nayu'ú ndasí de. Te ni iyo uu tée ndiso jniñu nuu soldado de, te ni kaje'ni tée un Is-boset níní jéé kixí de. Te ni kaki'in xinj de jee steén de nuu David, chi kájeni ni de jee kusih ni David jee ni jí'i Is-boset. Te ni ndaku David jniñu nuu tée ká'jin jíín de jee na ká'ni de tée un sīk̄i jee ní je'ni de Is-boset.

Te ná ni jí'i Is-boset te ni kandutútú ndí'i ñayuu ñuu hebreo jiín David nuu néne de ñuu Hebrón. Te ni katejníñu de David kuu de rey ñuu Israel. Te je ni kuu

uxaq kuiyaq yosáva jee kúu de rey nuu ñáyuu yukun Judá. Te ni kuu de rey nuu ndí'i ñayuu hebreo oko uxi uní ga kuiya.

Jee ní konene David ñuu Jerusalén te ni ndaku de jniñu nuu ñáyuu ñuu Israel

Te kúní rey David jiín táka gá ñayuu hebreo jee ñuu Jerusalén na ndúu centro ñuu Israel. Te xína ñú'ún kánuú ka'ni de ñayuu jebuseo jee káyukú de yukuán. Te ni kuu jee ní kakanda de jiín ñáyuu jebuseo, te ni kastání de ñuu un ñuu David. Yukuán na te ni kasá'a de ve'e de yajni ñuu un.

Te David chi kújé'nu ga de kua'an de, chi chíndéé ñá'án Yáq Dios de. Te rey Hiram ñuu Tiro ni tají de yujnu jiín ñáyuu kasájniñu jee na sá'a de in palacio jee sokó de nuu David. Te ni jini David jee chíndéé ñá'án ndije ya de. Te ñuu Jerusalén ni ki'in ga de ña'an kúu ñasi'í de jiín ña'an kaka jiín de, te ni iyo ga se'e de.

Te ná ni jini ñayuu filisteo jee David kúu de rey ñuu Israel te ni kakajná'an de jiín ñáyuu hebreo uu jínu. Te ndíndúú jínu ni kanda David jiín de jíjná'an de, chi chíndéé ñá'án Yáq Dios ñayuu Israel.

Jee kuní David jee kiji yejnu íí ñuu Jerusalén

Te ná ni ya'a jeku tiempo te ni jeni ni David jee jíni ñú'ún kiji yejnu íí ñuu Jerusalén. Te ni stutú de soldado de, te ni je'en de ñuu naní Quiriat-jearim nuu katú yéjnu íí. Te ni kasoó de yejnu íí un núu in carreta, te ni nandikó de vekoo de ñuu Jerusalén. Te kájita ndí'i ñayuu te kájita jé'é de kuangoo de.

Te níní jee kuángoo de ichi te stíkí jee kastáa tí carreta ni ndukú tí kotúú tí. Te tee kua'an de yataq tí ni

skaá de nda'a de jee chítuu de náva'a tu nínga yejnu íí. Te ni ji'í-ni de síki jee ní ke'é de yejnu íí. Te ni sá'a jee ní kukuí'yá ni táká gá ñayuu un. Te ni je'en de jíín yéjnu íí in ve'e jee iyó yajni, te tuvá ni jéndeka de nde ñuu Jerusalén.

Te ni sá'a Yaq Dios jee vá'a jíín téé chíí ve'e nuu katú yéjnu íí un.



Ni jenuki'in David yejnu íí kuanu'un de jíín ndé ñuu Jerusalén

Jee ni jénuki'in David yejnu íí kuanu'un de jíín ndé ñuu Jerusalén

Te ni ya'a jeku tiempo te ni jenuki'in David yejnu íí jee ki'ín de jíín Jerusalén. Te vijna chi ni sá'a de nájny'un ni ndaku Yaq Dios jniñu nuu ñayuu hebreo jee jíni ñú'ún sá'a de, chi tée levita kándiso de yejnu kuangoo de jíín ndé ñuu Jerusalén. Te jekua ga ñayuu un kájita de jíín kájita jé'é de ní káni ichi.

Te ná ni jinungoo de ñuu Jerusalén te ni jekin de yejnu íí un ini ve'e ní jee ní satu'va David. Te ni kaje'ni de tijni kiti jee ni sóko ní de ti nuu ya, te suni kiti jee ni sóko de nuu ya siki jee kuní de koo maní de jíín yá. Yukuán na te ni kana David ndí'i ñayuu jee ní ndutútú na káji táká-ni de. Te ná ni ndí'i ni kayeji de, te kuanungoo de ve'e de.

Te ná ni najinu David ve'e de te ni ka'an ñasi'í de Mical siki de jee tu va'a kuiti ni sá'a de chi ni jita jé'é de nájny'un ñayuu neé, áchí ña. Te ni ka'an David jee ní jita jé'é de siki jee chíñú'ún de Yaq Dios, chi kúsíñ ni de jee ndí'i jee vá'a jé'e ya nuu ñayuu Israel. Te ni je'e ya castigo nuu Mical jee ni ká'an ña súkuan, te tu ní kúu koo se'e ña.

Ndese ni ndaku David jniñu

Yukuán na te ni ta'ú David sín sín jniñu nuu téé levita návaa kondito de ve'e nuu katú yéjnu íí. Te ni ka'an de jíín sava tée levita jee na téé de yaa, te sava ga de kata de, te sava ga de kondito de yé'yí.

Te sava ga tée levita un jíín sútú kendoo de ñuu Gabaón návaa kondito de ve'e ní jee ní kuva'a nde na téku Moisés, chi ná ni kuu Saúl rey ñuu Israel te ñuu Gabaón ni ijo ve'e ya.

Ni kakajná'an ga David tijni gá jínu, te níní ní kanda de. Te suni ni ndaku va'a de jniñu.

Jee ni sá'a David jee vá'a jíin sé'e Jonatán

Te ni nuku'un ni de jee ní jejnu'un de jee sá'a de jee vá'a jíin ñayuu ve'e tee ní kijná'an va'a de jíin jée naní Jonatán. Te ni kajnu'un de núu íyó gá ñayuu ve'e Saúl. Te ni jini de jee iyó in tee kojo jee naní de Mefi-boset jee kúu de se'e yií Jonatán. Te ni je'e de jnu'un jee konene Mefi-boset ve'e nuu ndeé de. Te ni je'e de jniñu nuu tée ní sájniñu nuu Saúl jee na sájniñu de nuu ñú'un Mefi-boset.

91. Jee ní jejnu'un Yaa Dios jee sá'a ya jee vá'a jíin David

(jee ka'án libro 2 Samuel 7; 1 Crónicas 17)

Te ná ni kejéé David ndaku de jniñu te ni jínu ni kuva'a palacio de, te ni kanda de jíin ñuu jee kájito u'u de jee káyukú yajni ñuu Israel. Yuquán na te ni kana de profeta Natán. Te ni ka'an David jee kuní de sá'a de in veñu'un nuu Yaq Dios, te ni ka'an de jíin Natán jee tu íyó vá'a jee yejnú ií kava ini ve'e ñii te máá de kondee de ini palacio. Te ni ka'an Natán jee vá'a kúu jee jéni ni David súkuán, te chindéé ñá'án yá de te kuu sá'a de. Te jekuáa yúkuán ní ka'an ya jíin Natán:

—Ki'in ro kastu'un ró nuu David jee ndeé rí ve'e ñii nde kiví ní kendakoo ñayuu hebreo ñuu Egipto, te tu ni in jínu ní jíkán ri in veñu'un. Te suni ka'an ro jíin de jee ní nakaji ri de nde na jíka de yuku lánchi, te máá rí kúu jee ni sá'a jee kúu de rey nuu ñayuu hebreo, jee kúu de ñayuu jee ní nakaji ri. Te níní chíndéé ñá'án rí de nuu kákajná'an de jíin ñayuu jíto u'u ni i de.

'Te sá'a ri jee kaa ga kujé'nu de te kuni ndí'i ñayuu jee maá de kúu jee kujé'nu. Te nuu ñayuu hebreo kuä'a ri ñuu yá'a koyukú de ní káni-ni, te ni in ñayuu ñinga ñuu ma kuá'a jnundó'o nuu de. Te níní kuu yukun David rey nuu ñayuu Israel. Te ma sáma ri jee ka'án ri, chi ma koo ga nájnu'un ni kuu jíin rey Saúl.

'Te nuu kásá'a David jiín yúkun de kuechi te kua'a ri castigo nuu de nájnu'un sá'a tátá jiín sé'e nuu kákunij'ni ni i. Te nuu ni ji'i David te nukuiñi in se'e yií de nduu rey. Te sá'a ri jee kujé'nu téyí de, te máá de kuu jee sá'a veñu'un nuu chiñú'ún ró ru'u —achí yá.

Jee ni jíkan ta'ú David nuu Yaq Dios

Te jee ñinga kívi ni je'en Natán ni kastu'ún de ndí'i jee ni ká'an ya nuu David. Yukuán na te kua'an David ve'e nuu katú yéjnu íi, te ni jíkan ta'ú de nuu ya. Te ni ka'an de:

—Tátá Yaq Dios, tu kúká'nu ni na ndese nakuatá'ú ná nuu ni. Chi ñayuu ve'e ná kákuu ná ñayuu nda'ú, te vijnal chi ni nakaji ní sáña jee kúu ná rey ñuu Israel. Te máá ní kúu jee ni sá'a ndí'i, chi máá ní kúu Yaq kujé'nu téyí. Te máá in-ni máá ní kúu Yaq ndaa. Te ni sá'a ní kué'e jniñu jé'nu jíin ná jee kákuu ná ñayuu hebreo siki jee kákuu ná ñayuu jee ní nakaji ní. Ni jnama ní tata jíi na ñayuu hebreo ná ni kakuu de mozo jee ni sájniñu sáá-ni de nuu ñayuu ñuu Egipto. Te ni tava ní ndí'i ñayuu cananeo jee káyukú de ñuu Canaán, te ni je'e ní ñu'un yá'a núu ná jee kóyukú ná jíjná'an ná.

'Te jíkan na nuu ni jee skiku ní ndí'i jee ni ká'an ni náva'a na kóto táká ñayuu jee kujé'nu téyí ní te máá ní kúu Yaq Dios jee káchiñú'ún ná jee kákuu ná ñayuu hebreo —achí David jíkan ta'ú de.

**92. Jeę ni sá'a rey David kuęchi xeęn nuę ya,
te ni ine ká'nu ni ya nuę de
(jeę ka'án libro 2 Samuel 11-12)**

Jeę ni kíxı David jiín ñasi'í Urías

Te in jínu ni tají David Joab, jeę ndáku jniñu nuu táka soldado hebreo, jeę na kíngoo de kuajná'an de jiín ñáyuu amonita. Te ni kendoo David ñuu Jerusalén. Te in je'íni kua'an veji David sikı vé'e palacio, te ni jito de in ña'an jeę jíchi ña, te luu káa ña. Yukuán na te ni jini de jeę kúu ña ñasi'í téé nání Urías, jeę kúu de in tée jeę kua'án jiín Joab jeę kuajná'an de jiín ñáyuu amonita. Te ñasi'í de nání ña Betsabé. Te ni nujna'an ndasí ni David ña, te ni ka'an de jeę na kíji ña nuę de. Te ná ni kee ña palacio te ni kíxı David jiín ña.

Te ná ni ya'a jeku tiempo te ni jini ña jeę ni ní'in sé'e ña, te ni tají ña jnu'un kua'an nuu David.

Jeę ní kuni David jeę ma kúni ñayuu jeę ni sá'a de kuęchi un

Te tu kúní David jeę kúni ñayuu jeę ni kíxı de jiín ñasi'í Urías. Te ni kiji ni jeni ni de jeę sá'a de su'va. Chi ni tají de jnu'un kua'an nuu Joab jeę kuni de jeę na ndíji Urías ñuu Jerusalén návıa kachi de ndese kua'an jeę kákajná'an de. Te súkuan ni sá'a Joab. Ni tají de Urías kuanu'un de ñuu Jerusalén.

Te ná ni jinu de nuu David, te ni kajnu'un David ndese kua'an jeę kákajná'an de. Yukuán na te ni ka'an de jiín Urías jeę na kí'in de ndıo de ve'e de. Chi ni jeni ni David jeę nu'un Urías kusu de jiín ñasi'í de, te súkuan te kani ni ñayuu jeę sé'e jeę ndétu Betsabé kúu se'e Urías, te ni in ma kúni jeę ni kíxı David jiín ña. Te

tu ní káchí Urías nu'un de ve'e de, chi ni kendoo de ni kixi de yajni yé'yí palacio nuu kákixi tée jee sájniñu nuu rey.

Te inga kiví te ni kajnu'ún David:

—¿Naun tu ní nú'un ro ndoo ro ve'e ro?

Te ni ka'an Urías jee tu íyó vá'a nu'un de ve'e de kusu de jíin ñasi'í de níní jéq ká'jin jekua jná'an de kákajná'an jíin jéq katú yéjnu íí nuu ká'jin de kákajná'an de.

Yukuán na te ni ka'an David jíin Urías jee na kéndo de inga kiví ñuu Jerusalén. Te ni kana de Urías ni kuxíni de jíin, te ni skó'o de Urías te ni najini de. Te vesusúkuan te tu ní jé'én Urías kendoo de ve'e de jekuáq un.

Te jené'en inga kiví te ni tají David in carta nuu Joab nuu ka'an jee na tájí de Urías nde ichi núú ga'náv'a kuu de nuu kákajná'an de un. Te súkuan ni sá'a Joab, te ni ji'i Urías me'ñú núu kákajná'an ñayuu un.

Te ná ni ya'a kiví jee ni íyo kuí'yá ni Betsabé je'e yíí ña, te ni ka'an David jee na kíji ña, te ni nduu ña ñasi'í David. Te ni jito Yaq Dios ndí'i jee ni sá'a David, te ni kití ni ya jíin de.

Jee ní kuxeen profeta Natán nuu rey David

Te ni tají yá jnu'un kua'an nuu David jíin profeta Natán. Te su'va ni ka'an Natán jíin David:

—Ni íyo in tée kúká ndasí jíin in tée ndá'ú. Te tée kúká un íyó kué'e ndasí kití de. Te tée ndá'ú un máá in lanchi de íyó jee kúu ndasí ni de, te ndító de nájnu'un ñayuu ve'e de. Te in kiví te ni jinu in ñayuu ve'e téé kúká, te ni jini ñú'un sátu'va de jee kaji tée un. Te kúu

de *in* ñayuu ndé'yí, chi tu *ní* je'ni de *in* kítí máá de *jee* sá'a de *jee* kaji *tée* un chi sa *ni* *je'en* de *ni* *je'ni* de lanchi *tée* ndá'ú —áchí Natán.

Te *ná* ni jini *só'o* David *jnu'un* *jee* ka'án profeta Natán, te *ni* kítí teyí *ni* de *ni* *jito* de *tée* kúká *un*, te *ni* *ka'an* de *jee* kúu *tée* *un* núú, te nachunaa de lanchi *jee* *ní* *sakuí'ná* de *te* *naku'a* de *kuun* *ga* lanchi *nuu* *tée* ndá'ú *un*.

Yukuán na te *ni* *ka'an* Natán:

—Máá ró kúu nájnu'*un* *tée* kúká *un* chi tu *vá'a* kuití *ni* *jeni* *ni* *ro* *ni* sá'a ró. Te *ni* tají Yáa Dios *ru'u* *jee* kachi *rí* *nuu* *ro* *jee* maá yá *ni* sá'a *jee* kúu ró rey, te *ndíto* ya ro'ó. Te *ni* *je'e* ya *kue'e* ñasi'í *núu* *ro*. Te máá ró *ni* *je'ni*



Ni kukuí'yá ni David *jee* *ni* sá'a de *kuechi*

ro Urías te ni naki'in ró ñasi'í de. Te vesú ñayuu amonita ni je'ni de Urías, te máá ró kúu jee ní ndaku ró jniñu ni kuu súkuan. Te ni jini ya ndi'i jee ni sá'a ró.

'Chi ni kuni'ni ni ro nuu ya, te tú skíku ró jnú'un jee yosó núu ley. Jee síkí yúkuan te kuña'a ya castigo nuu ró, chi kuña'a ya jnu'un jee ñayuu ve'e ró kuajná'an máá de jíjná'an de te kuña'a de kue'e jnundó'o nuu ró. Te suni kusú ingga tée jíín ñasi'í ró nduú. Chi ni kuni ro jee ní in ma kúni jee ni sá'a ró súkuan jíín Betsabé, te kuña'a ya jnu'un jee kúni ndi'i ñayuu hebreo taká jnundó'o jee koo jíín ró —achí Natán.

Súkuan ni ka'an Natán jiín David. Te ni ka'an David:

—Jendaá ndije jee ní kuni'ni ni ri nuu Yaq Dios te ni sá'a ri kuéchi xeén nuu ya —achí de.

Yukuán na te ni ka'an Natán:

—Jendaá jee ni sá'a ró kuéchi xeén nuu ya, te ma ká'ni ya ro'ó. Te se'e Betsabé chi kuu i —achí Natán.

Yukuán na te kuanu'un Natán ve'e de.

Jee ni jí'i se'e lulí Betsabé

Te ná ni ya'a jeku tiempo, te ni koku'u xeén suchí lulí un. Te ni iyo ndite ni David nduú ñuu úna kívi, te ni jikan ta'ú de je'e súchi lulí un úna kívi, chi kúní de jee kuña'a ya jnu'un jee ma kúu i, te vesú súkuan ni sá'a de te ni jí'i suchí lulí un. Te ná ni jini David jee ni jí'i suchí lulí un, te tuvá ni íyo ndite ni de.

Yukuán na te ni ndonda David ni jekonde'é de Joab jiín téé kákajná'an jíín ñayuu amonita. Te ni kakanda de síkí ñayuu amonita.

Te kuéé gá te ni skáku tuku Betsabé inga se'e yií ña te ni staní ña i Salomón. Te ni tají yá Natán jee kíkastu'ún de nuu David jee maní ya jiín Salomón.

93. Jee ní ndonda Absalón siki tatá de David *(jee ka'án libro 2 Samuel 13-15)*

Absalón jiín Amnón

Absalón kúu de se'e yií David. Te íyó in kuä'a de jee ín-ni tátá de in-ni náná de, te nání ña Tamar. Te luu ndasí káa ña. Te íyó inga se'e yií David, te nání de Amnón. Te kúu ni de Tamar, te kúu ña kuä'a de chi náná-ni de kúu jee ni sáma. Te in kívi te ni sta'ú de ña jee na kí'ín mañú'ún ña nuu kixí de. Te ná ni jinu ña te ni jní ndeva'a-ni de ña ni kixí de jiín ña. Yukuán na te ni kiji jee ní sama de jee ni jéni ni de te ni jito u'u de ña, te ni skunu de ña kua'an ña.

Te ná ni jini David jee súkuan ni sá'a Amnón, te tu ní kúxeen de nuu Amnón. Te ni kiti ni Absalón, te tu ní ndée ni de jiín Amnón.

Te ni ya'a uu kuiyä te ni sá'a Absalón in viko, te ni kana de ndi'i ñani de nde jiín ñani de jee siín náná. Te ni ka'an de jiín téé jee sájniñu nuu de jee na kóndetu de nde najini Amnón. Yukuán na te ka'ni de Amnón. Te súkuan ni kasá'a de. Te hekua ga se'e yií David ni kakoo de siki kiti de, te ni kajinu de kuangoo de.

Te Absalón chi jíní de jee kití ni tatá de David jee ní je'ni de Amnón. Jee yúkuán ní kane de ñuu Jerusalén, te kua'an de kondee de jiín tata jé'nú de, tátá naná de. Te ni kondee de uni kuiyä yukuán. Te je ni ndee ni David jee iyó kuí'yá ni de je'e Amnón. Te kúní David jee na nándikó Absalón te vesú súkuan te tu ní káchí de nuu Absalón jee nandikó de. Te ni ka'an Joab jiín rey:

—¿Á tu kuu kiki'in ná Absalón?

Te ni ka'an rey jee iyó vá'a. Te uu ga kuiya tu ní kúní David koto de nuu Absalón. Yukuán na te ni kuu jee ní kanajná'an de, te va'a-ni ni ka'an David jiín Absalón.

Jee ní kunj'ni ni Absalón jiín tátá de David

Te va'a jító Absalón, te ndí'i ñayuu hebreo kákusiñi ni i jiín de. Yukuán na te ni kunj'ni ni de, chi kúní de kuu de rey ñuu Israel. Te ni stutú de kue'e tee jee na chíndéé ñá'án de. Te táká-ni kíví ni jekuiñi de yé'yí muro ñuu Jerusalén. Te ni ka'an de jiín táká ñayuu jee kákuni i ki'in i nuu rey David návaa sándaa de táká jniñu jee iyó. Te ni ka'an Absalón:

—Te rey un tu kúní de kuni so'o de táká jniñu jee sándaa. Te núa jee maá rí kúu jee kúni na'ín táká kuéchi jee kájekin ro, te máá rí chi sándaa va'a ri —achí de.

Te ká'án va'a Absalón jiín ndí'i ñayuu ñuu de, te ndí'i ñayuu kánujna'an ni i de.

Te ni ya'a kuun kuiya, te je iyó tú'va Absalón ndonda de siki tatá de. Te ni jikán de jee kuá'a rey jnu'un jee ki'ín de ñuu Hebrón jee skíku de jee ní jejnu'un de nuu Ya Dios. Te ni je'e rey jnu'un jee ki'ín de.

Te tu ní káchí ndáa Absalón nuu tatá de, chi jee kuní de kúu jee kíví de kuu de rey ñuu Israel. Te ni je'en de ñuu Hebrón. Te kue'e ñayuu hebreo ni chindéé ñá'án Absalón. Te suni iyó in tee ndichí jee naní de Ahitofel te ni chindéé ñá'án de David. Te ni

iyo jee ní ndikó kóo de síki David, te ni kiví de chíndéé
ñá'án de Absalón.

Jee ní jinu David ni kenda de ñuu Jerusalén

Te ná ni jini David jee ndí'i ñayuu ni ndonda síki de,
te ni kiji ni jeni ni de jee kénda de ñuu Jerusalén
jijná'an de nde ná tu jinu Absalón jee ká'ni de David jiín
táka gá ñayuu. Te súkuan ni sá'a David, chi ni kenda de
jiín ñayuu ve'e de jiín ñayuu kasájniñu jiín de jiín
soldado de, te ni kendakoo de ñuu Jerusalén. Te ni stóo
de uxi ña'an jee jíka jiín de náva'a kondito ña palacio.

Te uu sutu jee naní Sadoc jiín Abiatar, jiín sava t  e
kúu de levita ni jengoo de ni jejna'an de David ná ni
kendakoo de ñuu Jerusalén, te k  ndiso de yejnu íí. Chi
k  n   de jee na k  'ín yejnu íí un jiín rey David. Te ni
ka'an David jee na n  ndikó de nakakin de yejnu íí un
n  u kat  .

—Chi n  u chind  e n  '  n Y  q Dios ru'u te ku  'a ya
jn  'un nandik   r   ñuu Jerusal  n —ach   de.

Te ni ka'an David jee vá'a ga kendoo ndind  ú s  tu
un ñuu Jerusal  n te taj   de jn  'un k  'in nuu David
ndese s  'a Absal  n ñuu Jerusal  n. Yuku  n na te sutu
ji  n t  e levita ni kanandik   de, te ni nakakin de yejnu
íí un n  u kat  .

Te k  ku  'y   ni David te kua'an de. Te ni ni'  n de
jn  'un jee chind  e n  '  n Ahitofel Absal  n. Te ni jikan
ta'   de nuu Ya  q Dios jee ma ku  'a ya jn  'un jee
kuat  '   Absal  n nuu jn  'un jee ka'  n Ahitofel.

Te ni iyo inga t  e ndich   n  n de Husai jee n  
chind  e n  '  n de David. Te ni je'en de ni najn  'an de
ji  n David, chi k  ku  'y   ni de síki jee n   ndonda



Absalón jiín Ahitofel

Absalón siki David. Te ni ka'an David jiín Husai jee na nándikó de ñuu Jerusalén, te sá'a-ni de jee chindéé ñá'án de Absalón, te nasuú jee ndaá kúu. Chi kúní David jee na chindéé ñá'án Husai de jee kastu'un de ndi'i jee iyó nuu sutú, te tají sútú jnu'un ki'in nuu David. Yukuán na te ni ki'in David ichi kua'an de, te ni kujíká gá de jiín ñuu Jerusalén.

94. Jee ni sá'a Yaq Dios jee tuní jéjnínu va'a jee sá'a Absalón

(jee ka'án libro 2 Samuel 16-20)

Jnu'un jee ní kaka'an Ahitofel jiín Husai

Te ni jinu Absalón jiín Ahitofel jiín táka gá tée ñuu Jerusalén, te ni ki'in Husai ichi kua'an de ni nanijná'an de jiín Absalón. Te ni ka'an de jee na chindéé ñá'án de.

Yukuán na te ni kajnu'un Absalón Ahitofel na vé kukúu jee sá'a de núu súkuán. Te ni ka'an Ahitofel jee na kúsú de jiín táka ña'an jee ni ndoo jee ní jika tátá

de jíín, chi súkuan te kuni táká ñáyuu jee jíto u'u jná'an de jíín tátá de. Yukuán na te tee jíka jíín Absalón ni kasá'a de ve'e ñíí síki vé'e palacio. Yukuán na te ni je'en de jíín ña'an jee jíka tátá de jíín, te ni kixi de jíín ña. Te súkuan te ni jito ndí'i ñayuu hebreo jee ni sá'a de súkuan. Chi jny'un jee ni ká'an Ahitofel chi níní kúndaq va'a.

Te īnga jny'un jee ni ká'an de kúu jee nastútú de kue'ē soldado te kingoo de yata David. Te suni ki'in Ahitofel, te ná najná'an Ahitofel jiín David te je ni kuitá de jíka de, te ka'ni Ahitofel David. Yukuán na te ndí'i ñayuu jee ndikín David nandikín Absalón 'te chindéé ñá'án de Absalón nií káni-ni.

Te ni kajeni ni ndí'i ñayuu jee vá'a ni ka'an Ahitofel. Te nde ná tu sá'a de jee ni ká'an Ahitofel, te ni kajny'un Absalón Husai ndese jéni ni de. Te ni ka'an Husai:

—Vijna chi jéni ni rí jee ni stívi Ahitofel ni ka'an de, chi tátá ró kúu īn soldado jee jiní va'a de kuajná'an de, te ma kéndoo de jíín táká gá ñayuu un. Te núu jínungoo ró te sanaa te sa ka'ni de soldado ró. Yukuán na te kuite núu jny'un jee tu ní kánda ró síki de. Jéni ni rí jee vá'a ga nastútú ró ndí'i ñayuu hebreo. Te súkuan te nduu kue'ē ga soldado ró, te ka'ni ró ndí'i ñayuu jee ndikín David —achí Husai.

Te Absalón jiín ndí'i ga ñayuu jee ndáku jniñu jíín de, ni kajeni ni de jee vá'a ga ni ka'an Husai vesú Ahitofel. Te vesú va'a ga ni ka'an Ahitofel vesú Husai, te tu ní jé'e Yaq Dios jny'un jee sá'a de cuenta jee súkuan kúu, chi síki jee kuní ya kua'a ya castigo nuu Absalón. Jee yúkuan Absalón jiín táká gá tee, ni kajetá'u de jny'un jee ni ká'an Husai.

Yukuán na te ni je'en Husai ni kastu'ún de nuu sutú táká jnú'un ndese ni kaka'an de. Te ni kastu'ún sútú nuu David jee na ndukú ndéyí de ya'a de yute Jordán jijná'an de, nává'a kuu kaku de nuu soldado Absalón jee nándukú de ka'ni de David.

Te ná ni jini Ahitofel jee Absalón jiín taka gá tee tu ní jétá'ú de jnú'un ni ka'an de, te ni nu'un de ve'e de te ni kuu jee ní je'ni de máá de.

Jee ní kakajná'an soldado Absalón jiín soldado David

Te ná ni nastútú Absalón ndí'i soldado de, te je ni kujíká David kua'an de nde ñuu naní Mahanaim. Te ni iyo tiempo jee sátu'va de soldado de kuajná'an de. Te



Ni jekone xiní Absalón ndayújnu

tee ndáku jniñu nuu soldado de tu ní kúní de jee ki'ín David nuu kákajná'an de, te ni kendoo David ñuu Mahanaim. Te kúu ndasí ni David se'e yií de Absalón, te ni ka'an de jiín soldado de jee ma sá'a de daño jiín Absalón.

Te ni kajejná'an soldado Absalón jiín soldado David. Te ni kanda soldado David, chi ni kaje'ni de okó mil soldado Absalón.

Jee ni jí'i Absalón nuu ní kakajná'an de

Te jeku soldado David ni jito de jee yosó Absalón siki ín kiti, te ni jinu de kua'an de. Te kiti un ní ya'a chiji ín ndayújnu. Te ni jekone xini de ndayújnu, te ni ndoo de ndíta kaa de ndayújnu un.

Yukuán na te ni jinu yachí ín soldado ni kachi de nuu Joab. Te ni nduxeen teyí Joab naje'e kúu jee tu ní jé'ni de Absalón. Te tu ní jé'ni soldado un Absalón chi jíní de jee tu kúní David jee kúu Absalón. Yukuán na te Joab jiín tée lulí jé'e ndíso ndajníñu jee jejníñu de nuu kákajná'an de, ni jengoo de ni je'ni de Absalón jee ndíta kaa ndayújnu un. Yukuán na te ni kachi Joab nuu ndí'i táká tée jee jé ni jinu ni kakajná'an de.

Te ná ni jini David jee tée jíka jiín de ni kakanda de nuu ní kakajná'an de te ni jí'i se'e yií de Absalón, te ni kukuí'yá ni de jee ni jí'i se'e yií de. Yukuán na te ni je'en Joab ni kuxeen de nuu David:

— ¿Na siki kúu jee sá'a ró súkuán? Chi ni chindéé ñá'án rí ro'ó, te sá'a ró nájny'un jee kákuu ri ñayuu kájito u'u ni ro'ó. Sá'a i jiín rí jee jéni ni ró jee vá'a ga ní káji'i ndí'i ri jijná'an ri te koteku se'e yií ró Absalón

nuú. Jíni ñú'ún kí'in ro ka'an ro jiín ndí'i tée jíka jíín ro jee kúsii ni ro jee ní chindéé ñá'án de ró'ó. Chi núu tuú te siáá de ró'ó jíjná'an de —áchí Joab.

Yukuán na te ni je'en David ni kukoo de yajni yé'yí ñuu un, te ni ka'an va'a de jíín tée jee jíka jíín de.

Jee ní kuní'ni ni Seba nuu David

Te ni ya'a jeku tiempo te ni je'en ñayuu yukun Judá ni nandukú de David. Te ni ka'an de jíín David jee na nándikó de ñuu Jerusalén. Te ni nandikó de ñuu Jerusalén jíín David. Te táká gá yukun un ní kakití ni de jíín yúkun Judá, chi kákukuésún ni de. Te íyó in tee nání de Seba ni jekondee de kúní'ni ni de. Te ñayuu yukun Judá chi ni ka'jin de jíín David te ndí'i ga ñayuu un chi ni ka'jin de jíín Seba. Te ná ni najinu_u tuku David ñuu Jerusalén, te ni tají de soldado de jee na kí'ín kuajná'an jíín Seba. Te ni chisq'yú Seba maá de in ñuu. Te Joab jíín soldado David ni kakondúu de ñuu un.

Te ñuu yúkuán íyó in ña'an jee ndichí, te ni kajnu'ún ña Joab:

—¿Na síkí kúu jee kuní ni stáan ni ñuu yá'a? Chi tu ndónda ñayuu ñuu yá'a síkí jná'an i —áchí ña.

Yukuán na te ni ka'an Joab:

—Máá in-ni Seba kúu jee nándukú rí.

Yukuán na te ni ka'an ña'an un jíín tée ñuu un jee na ká'ni de Seba. Te ná ni ji'i Seba, te ni ki'in de xini ni skáne de síkí muro nuu Joab. Te ná ni jínu ni kuu súkuán, te ni ka'an Joab jee jé ni jínu ni kakajná'an de. Yukuán na te kuanungoo de ve'e de.

95. Jee ni sátu'va David ndajníñu jee kuva'a veñu'un nuu ya

(jee ka'án libro 2 Samuel 24;
1 Crónicas 21:1-26:28; 28:1-29:22)

Jee ni íyo kue'yi xeén ñuu Jerusalén

Te ná ni ya'a tiempo jee ndáku David jniñu ñuu Israel, te ni ndane'en de in censo. Te jee sikí yúkuan ní kiti ni Yaq Dios jiín de. Te ni je'e ya jnu'un jee nákaji de ndé in jee uní castigo sá'a ya jee ndó'o ñayuu hebreo. Te ni nakaji de jee tají yá in kue'yi xeén jee ndó'o ñayuu uni kivi, chi yachi ga ndí'i vesú uu ga jnundó'o un. Te suni ni tají yá in ndajé'é ya jee stáan ñayuu Jerusalén. Yukuán na te ni ka'an Yaq Dios jee vá'a ga ma stáan ndajé'é ya un ñayuu Jerusalén.

Te ni kendoo ndajé'é ya un yajni nuu jexín in tee jebuseo trigo de, te ni jito David ndajé'é ya. Te ni ka'an Yaq Dios jiín David jee na sá'a de in altar nuu sokó de kiti nuu ya, te sá'a de máá núu ní kiji ndajé'é



Ni je'ni David tijni kiti jee ni sóko ní de ti nuu ya

yə. Te ni ka'ən təe jebuseo jeę chíi ñu'un un jéę va'a ga kuə'a sáá-ni de ñu'un un núu rey. Te ni ka'ən rey jee chunaa de va'a ga, chi tu kúní de kuə'a de nuu Yaą Dios in ndajníñu jeę tu ní jéku'un xu'un de. Te ni jeen de ñu'un un núu téé un.

Yukuán na te ni sá'a David in altar. Te ni je'ni de tijni kiti jeę ni sóko ní de ti nuu ya, te suni kiti jeę ni sóko de nuu ya siki jeę kuní de koo mani de jiín yá. Yukuán na te ni sá'a ya jeę ní kiji ñu'un ichi ándiví te ni je'mu ndi'i kiti jeę yosó núu altar. Te ni ka'ən ya jiín ndajé'é ya jeę na chuvə'a ya espada ya te ma sá'a xeen ga ya nuu ní in.

Jee ni sátu'va David ndajníñu jeę kuajníñu jee kuva'a ve'e ya

Te ve'e Yaą Dios jeę ní kuva'a nde tiempo Moisés chi íyó ndé ñuu Gabaón, te jíká kúu jeę ki'ín de jee niní jée iyó kué'yı. Jeę yúkuán ní sá'a David altar ñuu Jerusalén. Te ni ka'ən David:

—Nuu ni sá'a ri altar kúu nuu ndáne'en se'e yií rí veñu'un nuu ya —achí de.

Te vesú ni ka'ən Yaą Dios jiín David jeę nasuú de kúu jeę sá'a veñu'un nuu ya, te ni kuni de chindéé ñá'án de se'e yií de Salomón jeę sá'a de veñu'un. Te ni stutú de ndajníñu jeę kuva'a veñu'un un. Te ni je'e de jniñu nuu téé vekoo de inga ñuu jeę kández de Jerusalén, jeę na sátu'va de yuu jeę kúva'a veñu'un un. Te suni ni stutú de kaa jiín yujnu jeę naní cedro.

Te ni stutú de ndi'i sutu jiín ndi'i ga ñayuu jeę kákuu yukun Leví. Te ni sá'a de tijni grupo ñayuu levita, te siiñ siiñ jniñu sá'a in in grupo. In grupo

sández de veñu'un te sátu'va de jee kásoko ñayuu
trigo, te iŋga grupo sándaq de jniñu ñáyuu, te iŋga
grupo un kondito de yé'yí, te iŋga grupo un tee de yaa
jee chiñú'ún de Yaq Dios.

Síki jee tuvá konso de ve'e ya kaka de jíín, jee
yúkuan ní je'e David taqká jniñu yá'a núu de. Te súkuan
te chindéé ñá'án de taqká sútu. Te je ni kukue'e yukun
Aarón, chi je ni kuu oko kuun yukun jee kákuu sutu.
Te ni kasá'a de suerte náva'a kuni de na yoo sájniñu in
in yukun sutu veñu'un ya.

**Jee ní kachi David nuu Salomón ndese kuva'a
veñu'un ya**

Yukuán na te ni kana David se'e yií de Salomón. Te
ni ka'an de jíín:

—Máá ró kúu jee núkuiñí kuu ró rey ndaku ró
jniñu. Te ndaku máá ró jniñu jee kuva'a veñu'un nuu
ya —achí de.

Te ni ka'an David jee tu ní jé'e Yaq Dios jnu'un jee
maá de sá'a veñu'un nuu ya, chi siki jee kúu de in
soldado te ni je'ni de kue'e ñayuu. Te ni ka'an ya jee
se'e yií de Salomón kúu de in tee jee víta ni de. Te máá
de sá'a veñu'un nuu ya.

Yukuán na te ni kachi David nuu Salomón ndese
kuva'a veñu'un jíín jé'e na kuátá'u de nuu ley Yaq Dios.
Te suni ni kachi de nuu Salomón jee jé ni sátu'va de
taqká ndajníñu jee kuva'a veñu'un. Je ni sátu'va de oro
jiín plata jiín iŋga kaa jiín yujnu jiín yúu. Te ni je'e de
tutu nuu steén ndese kuva'a veñu'un jíín ndese koo
nuu ke'e veñu'un. Te suni ni ka'an de ndese tana de
jniñu nuu tée levita jiín sútu. Te ni ka'an de jee táka

jnú'un jeę ka'án de jíín Salomón, súkuan kúu jeę ní ndaku Yaą Dios nuu de.

Jeę ní ndaku David jniñu nuu táká téé sájniñu jíín de jeę na chíndéé ñá'án de Salomón

Te ni ya'a jeku tiempo te ni ka'an David jíín táká téé sájniñu jíín de jeę na chíndéé ñá'án de Salomón jeę kuva'a veñu'un. Yukuán na te ni stutú de ndi'i ñayuu ñuu Jerusalén, te ni ka'an de:

—Ni jeni ni rí sá'a ri in veñu'un nuu Yaą Dios. Te ni stutú rí ndi'i táká ndajníñu jeę kuva'a veñu'un. Te ni ka'an Yaą Dios jeę ma kúu sá'a ri, chi kúu ri in soldado. Te ni sá'a máá yá jeę kúu ri rey ñuu Israel. Te suni ni nakaji máá yá Salomón nukuiñi de kuu de rey, te suu de sá'a veñu'un.

"Te suni ni ka'an ya jeę núu ni ji'i Salomón te níní koo tee yukun de jeę nukuiñi de kuu de rey núu skíku de nuu ley ya. Te vijná máá ró, Salomón, jíni ñú'ún chiñú'ún ró Yaą Dios jíín ini jíín ánuá ró. Te koku'un ni ró jeę jíni ñú'ún chiñú'ún ró Yaą Dios te kuatá'u ró nuu ya. Te máá yá steén ya ndese sá'a ró. Te suni koku'un ni ró jeę maá yá ni nakaji ya ro'ó náva'a sá'a ró veñu'un nuu ya, te jíni ñú'ún ndukú ndéyí ró. Te ndi'i ró jijná'an ró ñayuu hebreo, jíni ñú'ún skuá'a ró ley ya te skíku ró núu ya náva'a kuu koyukú ró nií káni-ni ini ñuu Israel —achí David.

Te ni ka'an David jíín téé kásájniñu jíín de jeę na chíndéé ñá'án de Salomón chi kúlulí gá de. Chi jíni ñú'ún kendoo luu ndasí véñu'un ya. Te ni kastu'ún de na-ni ndajníñu ni stutú de jeę kuva'a veñu'un. Te sava chi kúu cuenta maá de. Te ni ka'an de jeę táká gá

ñayuu kuu kua'a i taká ndajníñu jee néva'a i jee kuvá'a veñu'un. Te kue'e ñayuu ni kasoko i ndajníñu te ni kusii ndasí ni David.

Jee ni jíkan ta'ú David nuu Yaq Dios

Yukuán na te ni jíkan ta'ú David nuu yaq níní jée ká'jin taká tée kándaku jniñu. Te ni ka'an de:

—Tátaq Yaq Dios, máá ní kúu Yaq kujé'nu ndije nuu ndí'i taká jée iyó. Te ndí'i jee iyó ini ñayiví kúu cuenta maá ní. Te máá ní kúu Yaq jeee jé'e ní ndí'i nuu na. Te nákua'a ná jeku-ni taká jée jé'e ní núu na. Te máá ní kúu Yaq jiní ini in in ánuá. Te jiní ni jée kusii ni na jée ni jé'e ná taká ndajníñu jee kuvá'a veñu'un ní. Te suni súkuan kákusii ni taká ñayuu jee ní kasoko i ndajníñu nuu ni. Chindéé ñá'án ní sañá jíjná'an ná jee ní káni kusii ni na chiñú'ún ná ni'ín. Chindéé ñá'án ní Salomón jee na kuátá'u de nuu ley ni jíín jée ná sá'a de veñu'un ní —áchí de jíkán ta'ú de.

Yukuán na te ni ka'an David jiín ndí'i ñayuu jee na nákuatá'u de nuu Yaq Dios. Te ndí'i ñayuu un ní kajekuiñi yití de te ni nákuatá'u de nuu Yaq Dios. Te inga kívii ni kasá'a de viko, te ni kasoko de kue'e kíti nuu yaq.

96. Jee ní tava rey David kue'e yaa jeee ka'án jnuu'un yíñú'ún núu Yaq Dios

(jee ka'án libro 2 Samuel 22-23; 1 Crónicas 16; Salmos 18; 96; 105:1-15)

Jiní David tée de arpa, te nujna'an ni de tée de te jíta de. Te suni táva maá de yaa jee jíta de. Te sava yaa jee táva maá de kúu jee níku'un ni de in tee ní jí'il, te sava ga kúu jee chiñú'ún de Yaq Dios.



Nújna'an ni David tée de arpa

Yaa jee ní jita David jee nákuatá'ú de nuu Ya₄ Dios

Te su'va ká'án ñn yaa jee ní tava maá de jee
nákuatá'ú de nuu Ya₄ Dios jee ní jnama ya de jee ka'ni
rey Saúl de núú:

“Ya₄ Dios kúu jee ndító ya ru'ü te jnáma ya ru'ü.
Te na nákuatá'ú ndí'i ñayuu nuu ya. Te kakān rí nuu
ya jee niní chindéé ñá'án yá ru'ü nuu táka jnúndó'o jee
kiji nuu rí. Te máá yá chi níní chíndéé ñá'án yá ru'ü.
Te ná ni jini rí jee tée jíto u'ü i ru'ü, ka'ni i ru'ü, te ni
jikan rí nuu ya jee na chíndéé ñá'án yá ru'ü. Te ni jini
so'o ya, te ni kití ni ya jiín ñáyuu jíto u'ü ni i ru'ü. Te
ni jnama ya ru'ü nuu tée jíto u'ü de ru'ü, v̄esú yo'yo
ndákui de.

“Te ni jini ya jee tu jíni ñú'ún sá'a de súkuan jíín rí,
chi s̄ik̄i jee niní jétá'ú rí nuu ley ya. Jee s̄ik̄i yúkuan ní

chindéé ñá'án yá ru'ʉ. Chi súkuan sá'a Yaꝫ Dios, chi sá'a ya jee vá'a jiín ñáyuu vá'a ni, te jé'e ya jnundó'o xeen nuu ñáyuu jee tu kásá'a va'a. Jendaá jee ní chindéé ñá'án yá ru'ʉ. Te táká jniñu jee sá'a ya níní iyó ndáaꝫ. Ndító ya ñayuu jee kandíje i ya. Te máá yá ni chindéé ñá'án yá ru'ʉ jee kánda ri síkì ñáyuu jíto u'ʉ i ru'ʉ. Jee yúkuan nákuatá'ú rí nuu yá, te kata ri nuu yá niní jee téku rí.”

Yaa jee ní jita David nuu Yaꝫ Dios

Te ni tava rey David in yaa jee ka'án jee jé'nu Yaꝫ kúu ya ná ni jinu yejnu íi ñuu Jerusalén. Te su'va ká'án:

“Nakuatá'ú yó nuu Yaꝫ Dios. Te kastu'ún yó nuu ndí'i ñayuu táká jniñu jé'nu jee ni sá'a ya. Kata yó jée chiñú'ún yó yá te kani ni yo síkì ndí'i jniñu jé'nu jee ni sá'a ya. Tu ní náa ꝫ ni yá táká jée ni jéjnu'un ya nuu Abraham jiín Isaac jiín Jacob jee kuá'a ya ñuu Canaán nuu yukún de. Te ni je'e ya nuu yo jijná'an yó.

“Te kastu'ún yó nuu ñáyuu níi ká'nu ñayiví jee Yaꝫ Dios kúu jee ni sá'a níi ká'nu ñayiví. Te yaꝫ jee káchiñú'ún ñáyuu kúu ídolo-ni. Te ndí'i ñayuu ñayiví na chíñú'ún i nuu maá in-ni Yaꝫ Dios, chi máá yá ni sá'a ya níi ká'nu ñayiví. Te níi káni-ni na ká'án i jee Jehová kúu ya Yaꝫ kujé'nu, jee kúu Yaꝫ Dios jee káchiñú'ún yó jee kákuu yó ñáyuu hebreo.”

Yaa jee ní jita David ná ni yíi de

Te je ni yíi rey David te ni tava de inga yaa. Te ká'án su'va:

“Máá rí kúu David, jee ni sá'a Yaꝫ Dios jee kúu ri rey ñuu Israel. Máá rí kúu jee jíta nuu Yaꝫ Dios, te jé'e Espíritu yá jny'un ndese ka'an rí.

“Te ká'án ya_q je_e nūu īn to'_o ndáku va'a de jniñu nuu_q ñayuu ñuu de sīk_i je_e jetá'ú de ley Ya_q Dios, súkuan te sá'a de je_e kákusi_q ni ñayuu. Te kákusi_q ndasí ni ñayuu chi kúu nájnu_q'un īn ne'en je_e ní nane nduva níandii sīk_i yukú vixé je_e ní kuun savu_q. Te ñayuu ve'e ri chi ká'jin ní'in i jiín Yá_q Dios. Te ni sá'a ya īn trato jiín rí je_e ma ndí'i.

“Te máá ñayuu je_e tu jétá'ú i nuu_q ya_q, tu ndé jéjníñu kuiti, chi kákuu i nájnu_q'un ndayújnu je_e yí'i iñu. Te ni ma kúu jn_i ñayuu ndayújnu un jiín nda'a i, chi jéjníñu-ni je_e kayú”, achí yaa je_e ní tava David.

97. Je_e ní nukuiñi Salomón, se'e yií David, kuu de rey ñuu Israel

(je_e ka'án libro 1 Reyes 1:1-2:12; 1 Crónicas 29:22-30)

Ña'an lúlí je_e ní ndito David

Te ná ni yií téyí rey David, te níní ká'ñu de je_e míjin de, te ni tu násaa kuiti de. Te táká tée je_e sájniñu jiín de, ni jini de je_e súkuan kúu jiín de. Te ni ka'án de je_e na ndúkú de īn ña'an lúlí náv_a'a kondito ña de, te kus_u ña xiin de náv_a'a kuvixi de. Te ni nandukú de īn ña'an lúlí, te ni nani'jin de īn ña'an nání ña Abisag.

Je_e ní kunij'ni ni Adonías nuu tatá de David

Adonías kúu de se'e yií David, te luu jíto de. Te ni īn jínu tu ní ndáku tátá de jniñu nuu_q Adonías. Te jíní de je_e jé ni kuita rey te suni je ni yií de. Te ni jeni ni de je_e maá de nduu rey. Yukuán na te ni statú de kue'e ñayuu ni kondikij_n de Adonías. Yukuán na te ni ka'án de jiín Joab, je_e kúu de tée ndáku jniñu nuu_q soldado rey David, jiín Abiatar, je_e kúu de sutu_q, je_e na chíndéé ñá'án de Adonías. Te sutu_q je_e naní de Sadoc, jiín

profeta Natán, jiín Benaía, jeę kúu tée ndáku jniñu nuu soldado jee ndítio David, jiín suni máá téé ndítio de rey David, chi tu ní káchindéé ñá'án de Adonías.

Yukuán na te ni sá'a Adonías viko in lugar nuu naní Rogel, te ni kana de tée kándaku jniñu nuu yukún Judá, jiín ndi'i ñani de, te tu ní kána de ñani de Salomón, ni profeta Natán, ni táká soldado jee ndikín rey David.

Jee ní tejníñu David Salomón jee kuu de rey

Te ni jini profeta Natán jee kuní Adonías kuu de rey. Te ni je'en de nuu Betsabé, naná Salomón, te ni kasty'ún de ndi'i jee iyó. Te ni ka'an de jee jíni ñú'ún kí'in ña ka'an ña jíin David jee ní jejny'un máá de jee Salomón nukuiñi de kuu de rey ñuu Israel. Te ni je'en Betsabé ni ka'an ña jíin rey David, te ni kachi ña ndi'i jnu'un jee ni ká'an Natán. Te níní jee ka'án ña te ni jinu-ni Natán. Te ni ka'an de jee ndaá kúu jee ka'án ña.

Yukuán na te ni kana David Benaía, jeę kúu de tée ndáku jniñu nuu soldado jee ndítio rey David. Te ni ka'an rey jiín de:

—Soó sé'e yií rí Salomón siki kítí ri te ki'in ro jiín de lugar naní Gihón, chi yukuán kósó Sadoc jiín Natán aceite xinj sé'e yií rí jee steén jee maá de kuu rey —achí de.

Te Sadoc jiín Natán jiín Benaía ni kasá'a de nájny'un ni ka'an rey. Te ñayuu jee ni jéngoo i ni kanataka i kákana i:

—Salomón kúu de rey.

Jee ni jíkan Adonías nuu Salomón jee ma ká'ni de

Te sá ní jinu ni kayeji Adonías jiín amigo de, te ni jini de jee kúvaq. Te ni jinu in se'e yí sútú Abiatar, te ni kastu'ún de jee ní ndaku rey David jniñu jee Salomón kuu de rey. Te ná ni kajini so'o ndi'i ñayuu jee ká'jin jiín Adonías ni kanayu'ú ndasí de, te ni kajinu de kuangoo de ve'e de.



Ni yoso Salomón siki kiti David

Te ni je'en Adonías ve'e ya, te ni jnii de pico altar ya. Chi súkuan kásá'a ñayuu hebreo náva'a kakán de jee ma ká'ni ñayuu un de. Yukuán na te ni ka'an Salomón jee ma ká'ni de Adonías núu ma ndukú gá de kuu de rey, te kuu nu'un de ve'e de.

Jee ni jé'e David sandí'í na consejo nuu Salomón

Te jíní David jee ní kuyajni kuu de, te ni jé'e de sandí'í na consejo nuu Salomón jee kúu de rey. Te ni ka'an de jiín Salomón jee ma sáma kani ni de, te na kóo ndakui de. Te níní na kuátá'ú de nuu ley Yaq Dios te koo jee vá'a jiín de. Te núu kuatá'ú de nuu Yaq Dios, te skíku ya jee ní jejny'un ya nuu David jee niní koo tée yukun de jee nukuiñi de kuu de rey.

Suni ni ka'an David jee na kuá'a de castigo'nuu Joab siki jee ní je'ni de Abner jiín Amasa.

Te uu xiko kuiyá ni iyo David rey ñuu Israel te ni ji'i de. Te ni nukuiñi Salomón jee kuu de rey, te ni kuu de rey kujé'nu, chi súkuan ni kuni ya jee koo.

98. Jee ni kívi Salomón kuu de rey ñuu Israel

(jee ka'án libro 1 Reyes 2:13–4:34; 2 Crónicas 1)

Jee ni jé'e Salomón castigo nuu ñáyuu jee kájito u'u de

Te ná ni ya'a jeku tiempo jee ni jí'i David, te ni je'en Adonías ni konde'é de Betsabé naná rey Salomón. Te ni jikan de jee na chíndéé ñá'án ña de jee na kí'ín ña ka'an ña jiín Salomón jee na kuá'a de jny'un nandá'a Adonías jiín Abisag, ña'an lúlí jee ní kondito rey David ná ni yi de. Yukuán na te ni je'en Betsabé ni ka'an ña súkuan jiín Salomón. Te ná ni jini so'o de jee ka'án naná de

súkuan te ni kití teyí ni de ni jito de Adonías. Te ni ndaku de jniñu nuu soldado de jee na kí'ín de ka'ni de Adonías, chi síki jee jiní Salomón jee kuní Adonías nanda'a de jíin Abisag náva'a kívi de kuu de rey.

Yukuán na te ni skúnu Salomón sutu Abiatar ñuu Jerusalén, te ni tají de kuanu'un de ñuu nuu ní kaku de, chi síki jee ní chindéé ñá'án de Adonías. Te tu ní jé'ni de sutu un chi síki jee ní chindéé ñá'án tátá de David. Te Abiatar kúu de yukun Elí, te súkuan ni skíku jnu'un jee ni ká'an Yaq Dios síki yukún Elí nde jena'án téyí jee ma kúu ga yukun Elí sutu.

Te Joab kúu tee jee ní ndaku jniñu nuu soldado David. Te ná ni jini de jee ní tají Salomón Abiatar kuanu'un de ve'e de, te ni nayu'u téyí de, chi síki jee maá de ni chindéé ñá'án de Adonías. Te ni je'en de ve'e ya, te ni jnii de pico altar, te ni ka'an nda'u de jee ma ká'ni ñayuu de. Te rey Salomón ni tají de Benaía jee ka'ni de Joab yukuán, chi síki jee Joab ni je'ni de Abner jiín Amasa, jiín jée súkuan ni ndaku tátá de David jniñu. Te yukuán na te tuvá ni íyo ñayuu jee ndukú de jee kuu de rey. Te ndi'i ñayuu ñuu Israel ni nujna'an ni de jee Salomón kúu de rey.

**Jee ni jíkən Salomón nuu Yaq Dios jee na kóo
ndíchí de**

Yukuán na te ni stutú rey Salomón ndi'i ñayuu ñuu Israel. Te ni je'en de jiín ndi'i ñayuu un ñuu Gabaón nuu iyó ve'e ya. Te yukuán ní je'ni Salomón in mil kití jee ni sóko ni de ti nuu ya. Te jekuáq yúkuan te ni kajnu'ún Yáq Dios Salomón:

—¿Na-ni vé kuní ro jee kuá'a ri nuu ro? —achí yá.

Te ni jikan Salomón:

—Ni sá'a máá ní jeé kúu ná rey nuu ñáyuu kue'ē yá'a, vesus kululí ga na, te tu jíní na ndese sá'a ná. Jeé yúkuan kúní na jéé chindéé ñá'án ní sañá jéé na kóo ndichí ná, návə'a kuni na ndé in kúu jeé vá'a te ndé in kúu jeé tu íyó vá'a. Te súkuan te kuu ná in rey jee ndáku va'a ná jniñu nuu ñáyuu maá ní jeé kúu ñayuu hebreo —achí de.

Te ni nujna'an ni ya jeé ni jikan Salomón jeé na kóo ndichí de. Te ni ka'an ya:

—Kue'ē ñayuu chi kakān de jeé na chíndéé ñá'án rí de ka'ní de ñayuu ñuu jeé jíto u'u ni de, chí jéé na kuá'a ri jeé na'án koteku de, chí jéé na kóo küká de te kujé'nu de. Te ró'ó chi tu ní jíkán ro táká jéé yúkuan, chi sa ni jikan ro jee na chíndéé ñá'án rí ro'ó jeé koo ndichí ró. Jeé sikkí yúkuan te kua'a ri jeé ni jikan ro. Te suni kua'a ri jnu'un jeé kukuká téyí ró jiín jeé kujé'nu ró te kuni ñayuu niñ ñáyiví —achí yá.

Jeé ni sándaq Salomón in jnundó'o jeé ni íyo jíín úu ña'an

Te ná ni ya'a jeku tiempo te ni jengoo uu ña'an ni jekonde'ē ña rey Salomón jeé na sándaq de in jnundó'o jeé íyo jíín ña. Chi kández ña in-ni ve'e, te ñú'un se'e ña. Te yajni-ni ni kakaku se'e ña. Te ni kuu jeé in jekuáq ni ji'í in i. Te kájnama jná'an ña suchí lúlí jéé téku, chi káka'an ña jeé sé'e ña kúu i.

Te ná ni jini so'o rey un jéé ní kando'o ña súkuan, te ni ka'an de jíín téé jeé sájniñ jíín de jeé na kíki'in de in espada. Yukuán na te ni ndaku de jniñu jeé na tá'ndé sáva suchí lúlí téku un te kua'a de sava sava



Ni ka'an naná súchí lúlí jee ma ká'ni tee un i
nuu ndindúú ña. Yukuán na te ña'an jee kúu ña náná
súchí lúlí téku un ní ka'an ña:

—Kava va'a ni ni má sá'a ní súkuan. Va'a ga siá'a
ní i nuu ínga ña —áchí ña.

Te ni ka'an ña súkuan chi kúndá'u ni ña i chi se'e
máá ña kúu i. Te va'a ga ni kuni ña jee na kéndoo i
nuu ínga ña'an vesus jee kúu i. Te inga ña'an un chi ni
ka'an ña jee na tá'ndé sáva i núu súkuan. Te ni ka'an
ñá súkuan chi tu kúní ña jee ní in ña kendoo jíín súchi
lúlí un. Yukuán na te ni ka'an Salomón:

—Nakuq'a suchí lúlí jíña nuu ña'an jee ní kundá'u
ni ña i, chi máá ña kúu náná i.

Te súkuan ni kasiá'a de suchí un núu naná i.

Te ná ni jini ñayuu hebreo jee súkuan ni sándaq de
jnundó'o un, te ni kajeku'un ni de jee ni jé'e ya jnu'un
jee koo ndíchí Salomón.

Jee ní ndaku Salomón jniñu

Te tiempo jee ní ndaku rey Salomón jniñu nuu
ñayuu Israel te ni kakoykú vá'a de. Te kue'e ñuu jee
yúku yajni jíín de ni kachunaa de xu'ún núu rey
Salomón, te tu ní kákajná'an de jíín ñayuu hebreo. Te
ni kukuká téyí rey Salomón. Te ni konevq'a de kue'e
kiti jíín carreta jiín kué'e jee kaji de. Te ni kundíchí
téyí Salomón. Te ni tee de kue'e jnu'un ndíchí jée
steén, te ni tava maá de yaa. Te ni skuá'a de sikundí'i
taká ndinuu yujnu jíín yúku jíín taka kiti. Te ni jini
ñayuu jee káykú jíká jée ní kundíchí téyí de, te ni kiji
de nuu rey Salomón jee kuni so'o de ndese stéén de
taká jnu'un ndíchí. Te ndí*'i* de kándiso de ndajníñu jee
sokó de nuu rey.

99. Jee ni sá'a rey Salomón in veñu'un nuu ya (jee ka'án libro 1 Reyes 5-7; 2 Crónicas 2:1-5:1)

Te ni kakijná'an va'a rey David jíín Hiram jee kúu
de rey ñuu Tiro. Jee yúkuán, ná ni jí'lí David te ni tají
Hiram jnu'un kua'an nuu Salomón jee kúsih ni de jee
kúu Salomón rey.

Yukuán na te ni tají Salomón jnu'un nuu rey Hiram
jee na tájí de ñayuu sájniñu unuú-ni jíín ñayuu hebreo
jee ka'nde de yujnu cedro jee íin ñuu Tiro náva'a
kuva'a veñu'un ya. Te ni ka'an rey Hiram jee kuu núu

súkuan. Yukuán na te ni tají Salomón teé hebreo náva'a na chíndéé ñá'án de teé jee ní tají rey Hiram. Te suni ni tají de jee kaji ñayuu un jíjná'an i. Te súkuan ni sá'a Salomón jee ni sátu'va de ndajníñu jee kuva' a veñu'un un. Te jee xína ñú'ún ní sátu'va tátá de David kue'e ndajníñu.

Te kuiyq kuún jee ndáku Salomón jniñu, te ni kejéé de ndáku de jniñu jee kuva' a veñu'un ya. Te je ni ya'a kuun ciento kuun xiko kuiyq jee ní kendakoo ñayuu hebreo ñuu Egipto. Te ni kasá'a de veñu'un ya nuu ni sá'a David altar nuu ya ná ni tají yá kue'yı xeén nuu ñáyuu.

Te veñu'un un yíkua'á úxi metro jee jité jiín óko uxi jee káni jíin xá'un jee sukún. Te ichi núu iyó yé'yí te yuvé'e chi unuú-ni káni jíin véñu'un un te jité u'un metro. Te ini veñu'un chi ni sá'a de uu cuarto. Te cuarto jee íne yajni yé'yí chi yíkua'á óko metro jee káni jíin úxi jee jité. Te īnga cuarto jee íne ichi íni ga yíkua'á úxi metro jee jité jíin úxi metro jee káni.

Te cuarto yá'a kúu jee íí ndasí, chi yukuán ní jekin de yejnu íí te suni índichi uu querubín. Te ni kata kaa de īn sa'ma jee sasıñin ndindúú cuarto un ini veñu'un. Te xiin véñu'un un ní kasá'a de tijni cuarto lulí jee kuajníñu de chuva' a de taká ndajníñu. Te ni kasama de veñu'un jíin yúu. Te ichi íni ni katejnıñ de yujnu cedro. Te ni katejnıñ de oro nıñ ká'nu nuu yújnu cedro un. Te ni sá'a de īn altar nuu kayú suje kytú jíin úxi mesa nuu kóyukú pan ij jíin úxi candelero jíin ciento ko'o kunú. Te taká ndajníñu yá'a ni kuva' a jíin oro.

Te ni īyo īnga teé nání de Hiram, te jíní va'a de sá'a de ndajníñu ndíchí. Te ni stúte de kaa naní bronce, te

ni sá'a de in jee tikuíté nū'u kú'un ndute, jiín úxí jee na káa tije'en káa nuu kuu nanda'á de te ndéé rueda ichi jé'é, jiín in altar nuu kayú kití jee kásoko de nuu ya, jiín táka ndajníñu jee kuajníñu de nuu altar. Te ni sá'a de uu poste ká'nu jee ní jeni de in in lado ye'yí.

Te ni sínu Salomón ni sá'a de veñu'un ya kuiyá uxí in jee ní ndaku de jniñu. Chi uxá kuiyá ni kasájniñu de te ni jínu veñu'un ya. Te ná ni jínu jee ní kuva'a veñu'un un te ni chuva'a rey Salomón oro jiín plata jee ni sóko tatá de David nuu Yaq Dios, ini táká ve'e lúlí nū'u káchuva'a de táká ndajníñu un. Yukuán na te ni ndaku Salomón jniñu jee na kúvá'a sín palacio de ñuu Jerusalén.

100. Jee ni sá'a rey Salomón in viko jee ni jínu veñu'un

(*jee ka'án libro 1 Reyes 8:1–9:9; 2 Crónicas 5:2–7:22*)

Te ná ni jínu ni kuva'a veñu'un, te ni kana rey Salomón ndí'i ñayuu ndíso jníñu ñuu Israel jee na ndútútú de ñuu Jerusalén jee koo viko sámá ndayújnu. Chi kúní de sá'a de in viko síkí jee ni jínu veñu'un. Te suni kúní de jee kiji yejnu íí jee katú ve'e ñíí jee ni sá'a David ini veñu'un jee ni sá'a de.

Te ná ni ndutútú ndí'i ñayuu ñuu Jerusalén te ni kandiso ñayuu levita yejnu íí, te ni kajekin de ini veñu'un nuu kúu lugar ií ga nuu sín ndíndúú querubín. Te jee iyó ini yejnu íí un kúu uu yuú nuu yosó ndí'úxí jnu'un jee ní ndaku Yaq Dios jniñu.

Te kiví yúkuán ní kaje'ni ñayuu hebreo kue'e ndasí lanchi jiín stíkí jee ni sóko de nuu ya. Te sutu jiín téé levita ni tee de yaa te ni kajita de jee chiñú'ún de máá



Ni kandiso tee levita yejnu íí

Yáa Dios ndaaq jeeq kúu Jehová, chi siki jeeq vá'a ndasí ni ya, te tu ní siáá ya jeeq koo maní ya jiín de. Te níní jée jíta de te ni kivi ya ini veñu'un me'ñú víko ndíij ndasí. Te tuvá ni kúu kone sutu ini veñu'un siki jeeq ndíij ndasí víko un.

Yukuán na te ni ka'an Salomón:

— Va'a ndasí ni Yáa Dios. Te ni nakaji ya Jerusalén jeeq kuu ñuu ya. Te ni nakaji ya tatá ri David jeeq ní kuu de rey. Te ná ni kuni de jeeq sá'a de in veñu'un nuu ya, te ni ka'an ya jiín de jeeq koo in se'e yih de jeeq sá'a de

veñu'un nuu ya. Te vijna ni skíku ya jnuu'un ní ka'ān ya, chi máá rí kúu rey ñuu Israel te ni sá'a ri veñu'un nuu ya. Te ni nachune ri yejnu íí ini veñu'un ya —achí de.

Jee ni jíkan ta'ú Salomón nuu Yaq Dios

Yukuán na te ni jíkan ta'ú Salomón nuu Yaq Dios:

—Te ni in yaq tu íyó ndáq nájnuu'un máá ní, Jehová, chi máá ní ni sá'a ní trato jiín ñayuu maá ní, te skíku ní. Chi vijna te jiní na jéq ni skíku ní jéq ni ká'ān ni jiín tátá na David. Chi ni ka'ān ni jéq núu kuatá'u ná ley ni te ní káni koo yukun de jeq ndaku jniñu ñuu Israel. Te vijna te ká'án nda'u ná jiín ní jéq na skíku ní táká jnú'uñ jéq ni ká'ān ni.

'Chi ni sá'a ná in veñu'un nuu ni. ¿Te á kuu konene ní ve'e jéq sá'a tee? Chi ndí'i ná jiní na jéq kujé'uñ téyí ní te tu kánda andívu kone ní. Te ni jejnu'un ní jéq koo ní ini veñu'un jéq ni sá'a ná. Te jíkán na núu ni jéq niní kondee ní ini veñu'un yá'a. Te jíkán na núu ni jéq na kúni so'o ní jéq jikán ñayuu maá ní nuu ni ini veñu'un yá'a. Vesú jiká íyó i te núu ni ndakoto i ichi núu iyó veñu'un ní te ni jíkan ta'ú i nuu ni, te jíkán na núu ni jéq na kúni so'o ní táká jnú'uñ jéq jikán ta'ú i nuu ni.

'Te núu sá'a ñayuu maá ní kuëchi nuu ni, te sìkì yúkuan te kua'a ní jnú'uñ jéq kundo'o i tìjñi jnundó'o. Sanaa te kanda ìnga ñuu jéq jító u'u ni i ñayuu hebreo, chí sanaa te koo jnamu chí kué'yì, chí sanaa te kiji kue'e kiti chí jéq stáq tì táká jéq táji i. Núu ndo'o i súkuan te núu kakuñ ta'ú i nuu ni te núu stéén i jéq kánakuni i jéq ní kasá'a i kuëchi te núu siáá i jéq sá'a i súkuan, te ká'án nda'u ná jiín ní jéq kuni so'o ní jéq jikán ta'ú i te kone ká'nu ni ni núu i.

'Te núu kuni ñayuu īnga ñuu jeę kujé'nu ndasí ní te núu kiji i kakān ta'ú i ya'á, te jíkán na núu ni jéę suni kuni so'o ní jéę jikán ta'ú i. Te súkuan te kuni ñayuu nií ká'nu ñayiví jéę Yaá ndaaₖ kúu ní te chiñú'ún i ní'ín. Te núu ñayuu maá ní sá'a i kuechi te núu kuq'a ní jnu'un jeę tée īnga ñuu ki'ín de jíín ñayuu maá ní nde ñuu de, te núu kánakuni i jéę ní kasá'a i kuechi te núu ndakoto i ichi núu íne veñu'un yá'a te kakān ta'ú i, te ká'án nda'ú ná jíín ní jéę na kóne ká'nu ni ni núu kuéchi i —áchí Salomón jikán ta'ú de.

Te ná ni ndi'i ni jikān ta'ú Salomón, te ni tají yá yáñu'un ichi ándiví jéę ní je'mu ndi'i kíti jéę ní kasoko nií de ti nuu ya. Yukuán na te ndi'i ñayuu ni kajekuiñi yití de nuu ya, te ni kanakuatá'ú de nuu ya. Yukuán na te rey jíín táka gá ñayuu ni kaje'ni de kue'e ndasí lanchi jíín stíki jéę ni sóko de nuu ya. Te ná ni jínu una kívi jéę iyó viko, te ni kandute táká ñayuu kuangoo i ve'e i. Te ndi'i ñayuu kákusiñi i síki ndi'i jéę vá'a ní sá'a Yaₖ Dios jíín rey David jíín rey Salomón jíín ndi'i ñayuu hebreo.

Jee ni ká'an Yaₖ Dios jíín Salomón

Te ná ni ya'a jeku tiempo te īn jekuáa ni jení Salomón jéę ni ká'an ya jíín de jéę ní jini so'o ya ndi'i jnu'un jéę ni jíkān ta'ú de. Te ni ka'an ya:

—Vijna te ndi'i ñayuu ki'ín i veñu'un jíín jéę sokó i nuu ri.

Te ni jejnu'un ya kuni so'o ya jéę kájikān ta'ú ñayuu hebreo. Te núu skíku va'a i nuu ya te núu nakuni i jéę ní kasá'a i kuechi te núu siáá i jéę ma sá'a ga i súkuan, yukuán na te kone ká'nu ni ya nuu i.

Yukuán na te ni ka'an Yaq Dios jiín Salomón jeé na kóku'un ni de kuatá'ú de nuu ley ya náv'a a níní koo in tée yukun de jeé ndaku jniñu ñuu Israel. Te n útu tu jétá'ú de ley ya te n úu kejé de chiñú'ún de ídolo, yukuán na te ku'a ya jnu'un jeé kingoo jíká ñayuu hebreo ndo'o i koyukú i ñinga ñuu. Te suni stóo ya veñu'un, te ku'a ya jnu'un jeé kiji tée ñinga ñuu te kanu de. Te ni ka'an ya jeé táká ñayuu jeé koto i jeé ni jnánu veñu'un te kuni i jeé ñayuu hebreo tu n í skíku i nuu Yaq Dios, chi ni chiñú'ún i ídolo. Jeé yúkuán n í kuu súkuán.

101. Jeé n í kujé'nu ndasí rey Salomón

(jeé ka'án libro 1 Reyes 9:10-10:29; 2 Crónicas 8:1-9:29)

Te ni sá'a rey Salomón veñu'un ya jiín palacio de. Te súkuán ni jika oko kuiya te ni jinu ni sá'a de. Te ni safuerza de ñayuu ñinga ñuu jeé néne ñuu Jerusalén jeé na sájniñu i nuu ndindúu jniñu yá'a jiín jekua ga. Te suni ni safuerza de ñayuu jeé nasá'a de muro jeé skondúu ñuu Jerusalén te suni ni jekin ga de ñuu jeé kúu cuenta ñuu Israel. Te rey Salomón jiín rey Hiram, jeé kúu de rey ñuu Tiro, ni katají de tijni barco náv'a kiki'in oro jiín yúu ndíi jiín yujnu lúu jiín ndíki jeé kúu marfil jiín chango.

Jeé ni jé'en reina Sabá niconde' é ña Salomón

Te ni jini reina jeé ndáku jniñu ñuu Sabá jeé ndí'i káka'an jeé kujé'nu rey Salomón te ndichí ndasí de, te ni je'en ña niconde' é ña de. Te ni kajnu'un ña táká jnú'un yí nuu de. Te ni kachi de ndí'i jeé n í kajnu'un ña. Te ná ni jito ña jeé vá'a te luu jito palacio de te ni ka'an ña:

—Tu n í kándíje ná jnú'un jeé n í nakani ñayuu nuu na jeé sikí ni'ín. Te vijnna jeé jito máá ná te jiní na jéé

tu ní káchi de ni sava jeę lúu jeę iyó yá'a. Va yo'yo kákusię ni ñayuu ve'e ní jíin táká ñayuu kasájniñu jíin ní. Naka jeę jé'nu kúu Yaą Dios ñayuu hebreo jeę ni jé'e ya in rey vá'a ndasí —áchí ña.

Yukuán na te ni soko ña nuü rey un oro jiín yúü ndíi jíin táká jí'yo jeę kívi nuü ndéyu. Te suni ni je'e de táká jéę ni jíkan ña nuü de. Yukuán na te ni nandikó ña kuanu'un ña ñuu ña.

Jeę ní kukuká Salomón

Te nuü kuiyá kí'in rey Salomón kue'ę xü'ún jéę káchunaa ñayuu ınga ñuu jeę yúku de ñuu Jerusalén, jíin ñayuu hebreo. Te néva'a de in silla ká'nu jeę maá-ni de jéjníñu. Te ni kuva'a jíin ndíki jeę kúu marfil te níñ ká'nu ndéjñę oro. Te iyó íñü escalón, te jínú nde nuü néne de. Te kátu in in jeę na jíto ndíka'a xiin silla ká'nu de, te uü uü nuü in in escalón, in tü in lado te ınga tü ınga lado escalón. Te ko'ø jeę jejníñu de ni kuva'a jíin máá-ni oro.

Te suni néva'a de kuün mil caballo jeę stáa tü carreta, jíin úxü uü mil tü jeę yosó soldado. Te kue'ę teyí tü. Te sava tü ndóo Jerusalén, te sava ga tü ndóo ınga ñuu. Te kúká téyí de vesú taká rey jeę iyó ñayiví, te suni ndíchí téyí de.

102. Jeę ní yii Salomón te ni kuní'ni ni de nuü Yaą Dios

(jeę ka'án libro 1 Reyes 11; 2 Crónicas 9:30-31)

Jeę ní chiñú'ún Salomón ídolo

Te rey Salomón ni nujna'an ndasí ni de ña'an. Te ni iyo kue'ę ndasí ñasiı de. Te ni nanda'a de jíin ña'an jeę násuü ña'an ñuü de kúu ña vesú ni ndaku Yaą Dios

jniñu nuu ñáyuu hebreo jeę tu jíni ñú'ún nanda'a de jíin ña'an inga ñuu. Te ni nanda'a de jíin sé'e sí'i rey Egipto jiín kué'e ga ña'an inga ñuu.

Te ni kachiñú'ún ña ídolo. Te Salomón chi manj de jíin ndi'i ñasi'i de. Te ná ni yi de te ni kakundeyí ña jíin de jeę na chíñú'ún de ídolo. Te ni sá'a de altar nuu káchiñú'ún ña ídolo yajni ñuu Jerusalén náva'a kuu chíñú'ún ña ídolo ña. Te suni máá de ni chíñú'ún de ídolo te suni ni chíñú'ún de Yaq Dios.

Jeę ni ká'an Yaq Dios jeę ni'ín Salomón castigo

Yukuán na te ni kit̄i ni Yaq Dios jíin de sik̄i jeę ní chíñú'ún de ídolo, te ni ka'an ya:



Ni chíñú'ún Salomón ídolo

—Ni kunij'ni ni rō nuu ley rī. Jeę yúkuan ma kuá'a ri jnu'un jeę ndaku yukun rō jniñu ní ká'nu ñuu Israel. Chi kuä'a ri jnu'un ndaku de jniñu nuu in grupo lulí-ni máá síkì jeę ní jejnu'un ri nuu tatá rō David jeę niní koo tēe yukun de kuu rey, jiín síkì jeę ní kuvä'a veñu'un ri ñuu Jerusalén. Te jekua gä ñuu Israel chi kani ri in tēe kuu de rey. Te tēe un chi sájniñu de nuu rō vijná —áchí yá.

Te nde kiví saá te ñayuu ñuu jeę káyukú yajni jíin ñayuu hebreo ni kandonda de síkì ñayuu hebreo.

Jeę ni ká'an Yaä Dios jeę Jeroboam kuu de rey

Te ni iyo in tēe yukun Efraín naní de Jeroboam, jee ní kuu de in tēe sájniñu nuu Salomón. Te in kiví te ni kane Jeroboam ñuu Jerusalén te ni najná'an de jíin in tēe nání de Ahías, jeę kúu de profeta. Te ni ki'in Ahías sa'ma jéé jéę ndi'yú síkì de, te ni je'nde de uxí uu pedazo. Te ni ka'an de jíin Jeroboam jeę na kí'in de uxí pedazo sa'ma un. Te ni ka'an ga de:

—Sá'a Yaä Dios jeę kuu ró rey te ndaku ró jniñu nuu uxí yukun sé'e Israel. Ma kuá'a ga ya jnu'un jeę ndaku yukun David jniñu nuu ndí'i ñayuu Israel síkì jeę ní jekondee Salomón chiñú'ún de ídolo. Jeę yúkuan kuá'a ya castigo nuu de kue'e kuiya.

'Chi kuä'a ya jnu'un jeę ndaku de jniñu nuu jéku-ni yukun sé'e Israel síkì jeę ní jejnu'un ya nuu David jiín jéę ní jetá'ú David nuu ley ya. Jeę yúkuan káchí yá nuu rō jeę ní nuu kuaná'ú ró nuu ley ya te kuä'a ya jnu'un jeę yukún rō kuu de rey ní ji'lí rō.

Te Jeroboam kúu de in tēe sájniñu ní'in de. Te Salomón ni tejníñu Jeroboam jeę na kónrito de tēe

yukun Efraín jiín Manasés jee sájniñu nuu de. Te ni ndukú de ndonda de síki rey Salomón, te tu ní kúndehyí de. Te ni kuni rey Salomón ka'ni de Jeroboam. Te ni jinu Jeroboam nde ñuu Egipto, te ni kendoo de yukuán ndé ni ji'i Salomón.

Te ni ndaku rey Salomón jniñu nuu ñáyuu Israél uu xiko kuiya, te ni ji'i de. Te se'e yí de Roboam ni nukuñi de kuu de rey.

Íyó jnú'un jeę ka'án nuü Antiguo Testamento te náka'ąn tuku nuü Nuevo Testamento

81. Jeę ní tejníñu ya Saúl kuu de rey ñuu Israel
Hechos 13:21

83. Jeę ní tejníñu ya David nduu de rey ñayuu Israel
S. Mateo 1:6
Hechos 13:21-22
Hebreos 11:32-34

85. Jeę ní je'ni David iñ soldado filisteo jeę sukún ndasí
Hebreos 11:32-34

**87. Jeę ní jinu David ni jito de rey Saúl, te kue'ę ñayuu
ndikín de**
S. Mateo 12:3-4
S. Marcos 2:25-26
S. Lucas 6:3-4

90. Jeę ní nukuiñı David kuu de rey ñuu Israel
Hechos 13:21-22
Hebreos 11:32-34

**91. Jeę ní jejnyı'un Yaą Dios jeę sá'a ya jeę vá'a jíín
David**
S. Mateo 1:1; 9:27; 12:23; 22:42
S. Marcos 10:47-48; 11:9-10; 12:35
S. Lucas 1:26-33; 1:69; 2:4; 2:11; 3:23-31; 18:38-39;
20:41
S. Juan 7:42
Hechos 2:30; 7:45-46
Romanos 1:3
2 Timoteo 2:8

**92. Jeę ni sá'a rey David kuęchi xeęn nuü ya, te ni ine
ká'nu ni yaą nuü de**
S. Mateo 1:6

**97. Jeę ní nukuiñi Salomón, se'e yií David, kuu de rey
ñuu Israel**

S. Mateo 1:6

99. Jeę ni sá'a rey Salomón in veñu'un nuu ya

S. Mateo 27:51

S. Marcos 15:38

S. Lucas 23:45

Hechos 7:47

101. Jeę ní kujé'nu ndasí rey Salomón

S. Mateo 6:29; 12:42

S. Lucas 11:31; 12:27

